

彊邛叢書



海田

如

業

壽

彊村叢書序

彊村侍郎校刻唐五代宋金元詞以元忠嘗助蒐討其
抱微尙約書成爲序其首今年秋工竣得別集百有十
三家總集所收猶不在此數盛矣哉自汲古以來至於
近時朋舊若四印齋靈鷲閣石蓮山房雙照樓諸刻皆
未足方也雖然彊村是刻之所以獨絕者則尙不因此
蓋嘗取今世所傳國策管晏荀列諸子書錄而知其校
刻各詞猶有劉向家法爲不可及焉按向所校讎以中
書爲主尙取太史書太常書大中大夫卜圭書射聲校
尉立書臣富參書臣向書校除復重定著篇數可見雖
据善本猶待參訂也而彊村所校如之其於誤字如以

趙爲肖以齊爲立以盡爲進以賢爲形以天爲芳又爲
備先爲牛章爲長每云皆已定殺青可繕寫可見實事
求是不妨改字也而彊村所校又如之顧彊村所尤致
意者則在聲律故於宮調旁譜之屬莫不悉心校定或
非向之所及然漢書藝文志旣載河南周歌詩又附河
南周歌聲曲折旣載周謠歌詩又附周謠歌詩聲曲折
度向所校必亦精審如彊村可知則又惜其書久亡并
無書錄之可證也且夫唐五代宋金元之詞漢魏六朝
之樂府也往讀宋書樂志漢鼓吹饒歌十八曲至有所
思之如呼豨臨高臺之收中吾雖已索解無從然猶得
据王僧虔啓所云諸調曲皆有聲有辭辭者歌詩聲者

若羊吾夷伊那何之類引爲比例獨至宋鼓吹饒歌上
邪晚芝田又如張諸曲幾於滿紙皆幾令吾微令吾令
人口呿舌撟不知其作何語及考諸樂府解題則云凡
古樂錄皆大字是辭細字是聲聲辭合寫致然然後知
樂工伶官旣無左驥史媿謦姐名倡理董其事士大夫
復以非肄業所及而不屑道又誰爲之刊正者故自宋
迄梁不過七八十年而沈約所見已踏駭如此使當時
有如彊村者出而校勘豈非宋史樂志導引六州十二
時降仙臺之流縱音節不傳不可歌甯至不可讀哉然
則漢魏六朝樂府以聲辭雜糅之故等諸若存若亡知
凡夫唐五代宋金元詞之僅存者欲延墜緒於一綫殆

非精校傳刻不可我彊村惟有鑒於此故夢窗鈔版者
三而草窗亦至於再其餘諸家亦復廣搜珍祕博訪通
雅必使豪髮無憾而後已豈不以南宋所傳望瀛十二
徧散序無拍韻語陽秋能言之而今不可知矣夷則商
霓裳羽衣曲十一段起第四徧至殺拍碧雞漫志能言
之而今又不可問矣姑無論大曲也甚而纏慢小令若
詞源所稱張樞寄閒集旁綴音譜者今且無自訪求恐
再閱百年卽此總集別集百數十家亦將灰飛煙滅不
及時整媿安知不如劉向所言爲其俎豆筦弦之閒小
不備絕而不爲大不備或莫甚焉不得不盡力以爲之
乎則又用心與向相同不但校讎守其家法已也元忠

故詳言之以告當世讀彊村叢書者

宣統丁巳冬十月癸未吳縣曹元忠序

疆村叢書序

詞興於唐成於南唐大昌於兩宋否於元剝於明至我
清又成地天之泰地雷之復焉聖人瑰意琦行爲者誠
多論者亦不鮮相率名以詩餘今人王夢湘釋之云是
非五七言之餘三百篇之餘也盛哉言乎宋旣昌行詞
過閤閤而聽謠俗說山川而道政事未嘗不取代風雅
之正變不甯惟是雖宗廟朝廷著作丕炳未嘗不狃於
大晟鍾呂則更以之代頌君臣上下不聞病其爲褻焉
然則體曾非褻道曾非小果得風教雅正頌容之妙雖
謂代興三百曾何不可非必四言榮而五七言遂賤長
短句賤而五七言又榮蘭陵賦篇靈均廿五規三百成

辭然而賦名立矣世不以病苟屈揚雲稱辭人之賦麗
以淫長卿諸家之作非不義兼懲創覆杯水熄焦原之
爛則誠處不可勝之勢矣然淫者必可反之復貞揚旣
有得於心悔焉而莫爲故詩人麗則之正末由庶見於
今不知而作匪直賦能淫人焉推焉而釋經然子史百
家然散儷文然五七言然詞又曾何不然亦軌諸三五
經教之原斯得矣修嘗論之詞至於宋若治道進爲成
周日中斯辰月盈斯闕非元明列賢之過抑又天運然
耳其中興乎我

清又若王道之凌遲於七雄八代及唐而昭陵茂治幾
隆成康故稱詞則望宋如歸其他必也我

清乎往者修與張孟劬談謂古今文章學術莫外官經
孟劬執其美人香草之令慢相難若此者亦能官經統
之否修曰子能外太師六詩陳詞歟曰風雅頌盡乎文
章形製焉曰賦比興盡乎文章情法焉斯誠百家騰躍
咸入聖環也元曲曾然甯唯詞詞運及今世固猶在貞
觀中葉名流輩興分肖有宋一體彊村先生則尤褻然
稱首平生所爲詞合三百廿五成之者何以能是職唯
心素使然也夫藝曾四術之一也樂曾六藝之一也樂
數降而成詞曾雲咸之末胄也然由心素結撰斯優優
乎徵四術之內誠先生蚤遺華簪興言則隱泮奐林下
曾回兩徵則其心素可測矣修與孟劬嘗操前說進質

明詞體非褻道非小先生領應微笑若契焉於心而不
言益讎訂所藏詞賡續刊行證律紬文卷帙恆手惟精
惟實罔敢或佞誠以宋賢爲職志金元逸人亦以操尙
馨素登之益覘先生之閔焉雖然先生甯直詞之乎哉
三百有正有變廿五變而無正則均時焉爲之若夫傷
人倫之廢哀刑政之苛吟詠性情以風其上達於事變
懷其舊俗則文章作者胥然更奚擇乎詩騷得斯誼成
詞集而行之先生功則盛已長洲沈修

疆村校詞圖序

逸社冬集疆村居士以校詞圖屬題余爲詩爲詞皆不就久而無以應也病山屢趣之一日閱直齋書錄解題於笑笑詞下得一事曰自南唐二主以下皆長沙書坊所刻號百家詞云云默數歷年蓋詞起五代越三百餘年而有長沙彙刻又越四百餘年而有海虞毛氏之刻又且三百年而後有居士之校刻也遼乎邈哉乃起而書其後曰詞莫盛於宋而宋人以詞爲小道名之曰詩餘及我

朝而其道大昌秀水朱氏錢塘厲氏先後以博奧澹雅之才舒窈之思倚於聲以恢其壇宇浙派流風泱泱大

矣其後乃有毘陵派起張舉文氏董管卿氏易學大師
周止庵治晉書爲春秋學者各以所學益推其義張皇
而潤色之由樂府以上溯詩騷約旨而闕忠微言而婉
寄蓋至於是而詞家之業乃與詩家方軌竝馳而詩之
所不能達者或轉藉詞以達之周氏退姜張而進辛王
尊夢窗以當義山昌谷其所以標異於浙派者豈非置
重於意內以權衡其言外諸諸乎焉有國史吟詠之志
者哉昔者吾友鷺翁王給諫以直言名天下顧其閒暇
好爲詞詞多且工復校刻其所得善本於京師以詔後
進方是時疆村與相唱和志相得若鍾呂之相宣前後
喁于而曲直歸分也鷺翁取義於周氏而取譜於萬氏

疆村精識分銖本萬氏而益加博究上去陰陽矢口平
亭不假檢本同人憚焉謂之律博士蓋校詞之舉驚翁
造其端而疆村竟其事志益博而智專心益勤而業廣
乾坤道息身隱焉文海內知交助蒐祕逸校成之詞已
刊者數十家未刊者方日出而未有已也軼海虞而比
數長沙褒然於詞苑爲第三結集可謂富歟疆村者居
士祖居埭溪在上疆山麓唐白文公詩所謂惟有上疆
精舍寺其後劉商學仙升舉地也吾浙山川名在山海
經而至今可指其所在按圖瞭然者東惟會計西惟浮
玉茗水爲最古上疆爲浮玉支麓而埭溪與施渚則茗
水西源也禹益所經夏少康帝杼封輻之墟越王句踐

鑄劍之蹟山水清絕雲物泱泱往往令人俛仰古今悲
思感慨而不可止居士雖家在彊村平生出入中外退
而寄居他郡圖中風物夢想所寄耳而長楸夏首之思
感不絕而苑莫達者鶩翁往矣獨竚眙乎荒塍枉渚之
閒憇悵謳調所自爲詞與所校之詞乃相與沕潏聯緜
延於無已嗟夫離騷之辭本易象劉勰言之宋玉微詞
世或以爲鐸椒春秋之裔緒辭與詞古今字後世讀居
士所爲與所著錄其將有感乎無聲之樂不盡之意乎
抑亦且曰不可見之易莫贊之春秋且於是焉在乎世
變浸淫於文字是又非張董周三先生所及知而五代
之後復有五代余思夫師說不傳或且以花閒尊前等

觀也於是乎言宣統丙辰秋九月寐叟沈曾植

彊村叢書刻既竣旬寐叟爲之序卒卒未有以應也
叟嘗爲序彊村校詞圖於三百年來詞刻條流昭晰
而不徒斷斷於讎勘之愒以弁簡端猶叟志也丁巳
十二月甲戌望孝臧識

彊村叢書總目

雲謠集雜曲子一卷 燉煌石室唐寫卷子本

尊前集一卷 梅禹金藏明鈔本

樂府補題一卷 鮑氏知不足齋叢書本

中州樂府一卷 明九峰書院刊本

天下同文一卷 毛氏汲古閣鈔本

補遺一卷 吳伯宛據述古堂寫本補

右唐五代宋金元詞總集五種

溫庭筠金匱集一卷 鮑澐飲鈔本

右唐詞別集一家

宋徽宗詞一卷 曹君直輯本

范仲淹范文正公詩餘一卷

曹君直校補歲寒堂刊范文正公集補編

本 附忠宣公詩餘

張先張子野詞二卷補遺二卷

黃子鴻校知不足齋叢書本

柳三變樂章集三卷續添曲子一卷

毛斧季據宋本校補本

晏幾道小山詞一卷

趙氏星鳳閣藏明鈔本

韓維南陽詞一卷

丁氏善本書室藏鈔南陽集本

王安石臨川先生歌曲一卷

宋紹興刊臨川集本

補遺一卷

無著庵輯本

韋驥韋先生詞一卷

吳氏瓶花齋藏鈔韋先生集本

張伯端紫陽真人詞一卷

元刊悟真篇本

蘇軾東坡樂府三卷

無著庵校訂編年本

黃庭堅山谷琴趣外篇三卷

宋閩刊本以明刊詞堂本校

劉夤龍雲先生樂府一卷

明刊龍雲先生文集本

秦觀淮海居士長短句三卷

黃蕘圖以殘宋本校舊鈔本

毛滂東堂詞一卷

吳氏璜川書屋影寫宋本以丁氏善本書室藏明鈔及他選本

校

米芾寶晉長短句一卷

星鳳閣鈔寶晉英光集本

謝邁竹友詞一卷

彭氏知聖道齋藏明鈔本

張舜民畫墁詞一卷

永樂大典畫墁集本

吳則禮北湖詩餘一卷

知不足齋藏鈔北湖集本

周邦彥片玉集十卷

宋嘉定刊本

賀鑄東山詞上一卷

瞿氏鐵琴銅劍樓藏殘宋本

賀方回詞二卷

勞異卿傳錄知不足齋鈔本

東山詞補一卷

吳伯宛輯本

王灼頤堂詞一卷

宋乾道刊本

張繼先虛靖真君詞一卷

知聖道齋藏明鈔本

米友仁陽春集一卷

聚珍版寶真齋法書贊本

汪藻浮溪詞一卷

明刊浮溪文粹本

劉一止茗溪樂章一卷

善本書室藏鈔茗溪集本

陳克赤城詞一卷

林无垢校補舊鈔本

阮閱阮戶部詞一卷

善本書室藏典雅詞本

張綱華陽長短句一卷

善本書室藏鈔華陽集本

沈與求龜溪長短句一卷

明刊龜溪集本

洪皓鄱陽詞一卷

吳伯宛校補舊鈔鄱陽集本

陳與義無住詞一卷

鮑淥飲校影宋鈔胡仲孺箋簡齋集本

王之道相山居士詞一卷

梅禹金藏明鈔本

朱敦儒樵歌三卷

范聲山校舊鈔本

歐陽澈飄然先生詞一卷

善本書室藏鈔歐陽修撰集本

朱翌澗山詩餘一卷

邵二雲藏鈔澗山集本

曹勛松隱樂府三卷

盧氏抱經樓藏明鈔松隱文集本

補遺一卷

無著庵據善本書室藏鈔松隱詞補

劉子翬屏山詞一卷

明刊屏山集本

仲并浮山詩餘一卷

大典浮山集本

王以寧王周士詞一卷

汲古閣鈔本

李流謙澹齋詞一卷

大典澹齋集本

史浩鄮峰眞隱大曲二卷詞曲二卷

史氏裔孫傳錄四庫本以

天一閣藏鈔進呈底本校

張掄蓮社詞一卷

善本書室藏鈔本

韓元吉南澗詩餘一卷

吳伯宛校補南澗甲乙稿本

洪适盤洲樂章三卷

洪氏晦木齋校刊盤洲集本

王之望漢濱詩餘一卷

大典漢濱集本

李洪芸庵詩餘一卷

大典芸庵集本

曾協雲莊詞一卷

大典雲莊集本

李昌澹軒詩餘一卷

大典澹軒集本

程大昌文簡公詞一卷

典雅詞本

王質雪山詞一卷

聚珍版雪山集本

楊萬里誠齋樂府一卷

日本舊鈔誠齋集本

周必大平園近體樂府一卷

宋刊平園集本

范成大石湖詞一卷補遺一卷

王半塘校知不足齋叢書本以韓氏

讀有用書齋藏汲古閣鈔本校

陳三聘和石湖詞一卷

汲古閣鈔本

京鏜松坡詞一卷

知聖道齋藏明鈔本

呂勝已渭川居士詞一卷

善本書室藏鈔本以鐵琴銅劍樓藏鈔本校

姚述堯簫臺公餘詞一卷

勞氏漚喜亭藏舊鈔本

趙彥端介庵琴趣外篇六卷

汪閩源藏舊鈔本

補遺一卷

無著庵據汲古閣刊介庵詞補

高觀國竹屋癡語一卷

汲古閣鈔本

劉過龍洲詞二卷

黃蕘圃藏錢遵王校本

補遺一卷

無著庵輯本

沈瀛竹齋詞一卷

知聖道齋藏明鈔本

葛長庚玉蟾先生詩餘一卷

續一卷 唐元素校舊鈔玉蟾集本

李石方舟詞一卷

大典方舟集本

姜夔白石道人歌曲六卷

補遺一卷 江研南傳錄陶南村鈔本

附張文虎舒藝室餘筆

校白石歌曲

韓泐澗泉詩餘一卷

善本書室藏鈔本

楊冠卿客亭樂府一卷

大典客亭類稿本

辛棄疾稼軒詞補遺一卷

辛敬甫輯刊稼軒集本

汪暉康範詩餘一卷 勞巽卿傳錄康範集本

趙善括應齋詞一卷 大典應齋雜著本

盧祖皋蒲江詞稿一卷 知聖道齋藏明鈔本

蔡戡定齋詩餘一卷 大典定齋集本

丘密丘文定公詞一卷 朱氏結一廬藏舊鈔本

廖行之省齋詩餘一卷 姚氏邃雅堂藏鈔本

張鎡南湖詩餘一卷 知不足齋叢書本 附張樞詞

吳泳鶴林詞一卷 大典鶴林集本

郭應祥笑笑詞一卷 毛斧季校紫芝鈔本

徐鹿卿徐清正公詞一卷 明刊徐清正公存稿本

張輯東澤綺語債一卷 善本書室藏明鈔本

清江漁譜一卷 吳伯宛輯本

游九言默齋詞一卷 鮑渌飲校補默齋遺稿本

汪莘方壺詩餘二卷 傳鈔方壺存稿本

王邁驪軒詩餘一卷 大典驪軒集本

劉克莊後村長短句五卷 劉燕庭藏鈔後村大全集本以張氏愛日精廬

張氏適園藏兩舊鈔本校補

徐經孫矩山詞一卷 明刊矩山存稿本

陳耆卿篔簹詞一卷 大典篔簹集本

吳淵退庵詞一卷 善本書室藏鈔退庵遺集本

吳潛履齋先生詩餘一卷續集一卷 邃雅堂藏鈔本

別集二卷 宋刊開慶四明志本

趙孟堅彝齋詩餘一卷知不足齋藏鈔彝齋文編本

趙崇嶠白雲小稿一卷吳伯宛輯本

夏元鼎蓬萊鼓吹一卷知聖道齋藏明鈔本

吳文英夢窗詞集一卷張廷璋藏明鈔本

補遺一卷無著庵據汲古閣刊夢窗甲乙丙丁稿補

附 夢窗詞集小箋

劉學箕方是閒居士詞一卷善本書室藏鈔方是閒居士小稿本

柴望秋堂詩餘一卷善本書室藏鈔秋堂集本

陳著本堂詞一卷善本書室藏鈔本堂集本

衛宗武秋聲詩餘一卷大典秋聲集本

牟巖陵陽詞一卷王伯沆校善鈔陵陽集本

劉辰翁須溪詞一卷

善本書室藏鈔本

補遺一卷

無著庵據翰墨全書補

周密蘋洲漁笛譜二卷集外詞一卷

江賓谷考證本

汪元量水雲詞一卷

趙氏小山堂鈔湖山類稿本

馮取洽雙溪詞一卷

典雅詞本以花庵中興詞選補

陳允平日湖漁唱一卷

勞異卿傳錄新城羅氏鈔本

西麓繼周集一卷

何氏夢華館鈔本

蔣捷竹山詞一卷

黃蕘圖藏元鈔本

熊禾勿軒長短句一卷

汪氏裘杼樓藏鈔勿軒文集本

張炎山中白雲八卷

江賓谷疏證本

李彭老李萊老龜溪二隱詞一卷

汪謝城輯本

黃公紹在軒詞一卷

空雅堂藏鈔本

陳德武白雪遺音一卷

知聖道齋藏明鈔本

陳深寧極齋樂府一卷

善本書室藏明鈔寧極齋稿本

家鉉翁則堂詩餘一卷

大典則堂集本

汪夢斗北游詞一卷

文津閣藏北游集本

蒲壽宍心泉詩餘一卷

結一廬藏心泉學詩稿本

張玉蘭雪詞一卷

孔氏微波榭傳錄小山堂鈔本

右宋詞別集一百十二家

王寂拙軒詞一卷

聚珍版拙軒集本

李俊民莊靖先生樂府一卷

汪魚亭藏鈔莊靖先生集本

元好問遺山樂府三卷

明高麗刊本

段克己遜庵樂府一卷

邃雅堂藏鈔本

段成己菊軒樂府一卷

邃雅堂藏鈔本

右金詞別集五家

丘處機磻溪詞一卷

晦木齋藏舊鈔磻溪集本

許衡魯齋詞一卷

明刊魯齋遺書本

王義山稼村樂府一卷

明刊稼村類稿本

朱晞顏瓢泉詞一卷

章怡田校瓢泉吟稿本

王惲秋澗樂府四卷

元刊秋澗大全集本

蕭剡勤齋詞一卷

善本書室藏鈔勤齋集本

姚燧牧庵詞二卷

聚珍版牧庵集本

趙文青山詩餘一卷

大典青山集本

補遺一卷

無著庵據鳳林書院草堂詩餘補

劉壘水雲村詩餘一卷

南豐劉氏家刻水雲村稿本

張伯淳養蒙先生詞一卷

繡谷亭藏明刊養蒙先生本集

劉敏中中庵詩餘一卷

大典中庵集本

劉因樵庵詞一卷

元刊靜修先生文集本

樵庵樂府一卷

元刊靜修先生遺詩本

胡炳文雲峰詩餘一卷

明刊雲峰文集本

陳櫟定字詩餘一卷

裘村樓藏鈔陳定字文集本

曹伯啓漢泉樂府一卷

善本書室藏鈔本

劉將孫養吾齋詩餘一卷

大典養吾齋集本

吳存樂庵詩餘一卷

鄱陽五家集本

黎廷瑞芳洲詩餘一卷

鄱陽五家集本

蒲道源順齋樂府一卷

善本書室藏鈔順齋閒居叢稿本

仇遠無絃琴譜二卷

邃雅堂藏鈔本

王奕玉斗山人詞一卷

金氏文瑞樓鈔本

劉詵桂隱詩餘一卷

瑣川吳氏藏鈔桂隱集本

安熙默庵樂府一卷

善本書室藏鈔默庵文集本

虞集道園樂府一卷

吳伯宛據道園學古錄及遺稿輯本 附鳴鶴餘音詞一

卷

朱思本貞一齋詞一卷

吳匏庵鈔貞一齋集本

張雨貞居詞一卷

邃雅堂藏鈔本

王旭蘭軒詞一卷

大典蘭軒集本

李道純清庵先生詞一卷

元刊清庵先生中和集本

周權此山先生樂府一卷

元刊此山先生集本

張楚古山樂府二卷

知聖道齋藏明鈔本

吳鎮梅花道人詞一卷

吳伯宛校補梅花道人集本

王結王文忠詞一卷

韓氏玉雨堂藏鈔王文忠集本

洪希文去華山人詞一卷

善本書室藏鈔續軒渠集本

歐陽玄圭齋詞一卷

明刊圭齋文集本

許有壬圭塘樂府四卷

至正集本

別集一卷

吳伯宛據圭塘小稿輯本

張翥蛻巖詞一卷

知不足齋叢書本以汪季青金繪卣二鈔本校

趙雍趙待制詞一卷

知不足齋叢書趙待制遺稿本

吳景奎葯房詞一卷

大典葯房樵唱本

宋褰燕石近體樂府一卷

梁氏兩股秋雨庵藏燕石集本

謝應芳龜巢詞一卷補遺一卷

善本書室藏鈔龜巢集本

耶律鑄雙溪醉隱詞一卷

善本書室藏鈔雙溪醉隱集本

李庭寓庵詞一卷

孔莊谷藏鈔寓庵集本

梁寅石門詞一卷

吳伯宛校唐鶴庵鈔本

袁士元書林詞一卷

傳鈔書林集本

舒頔貞素齋詩餘一卷

善本書室藏鈔華陽貞素文集本

舒遜可庵詩餘一卷

善本書室藏鈔可庵搜枯集本

沈禧竹窗詞一卷

知聖道齋藏明鈔本

凌雲翰柘軒詞一卷

吳伯宛據西泠詞萃重編本

韓奕韓山人詞一卷

明刊韓山人集本

李齊賢益齋長短句一卷

明刊益齋亂稿本

右元詞別集五十家

雲謠集雜曲子目錄

鳳歸雲

四

天仙子

二

竹枝子

二

洞仙歌

二

破陣子

四

浣沙溪

二

柳青娘

二

傾杯樂

詞缺

雲謠集雜曲子

鳳歸雲

征夫數載萍寄他邦去便無消息累換星霜月下愁聽
砧杵擬塞雁□行孤眠驚帳裏枉勞魂夢夜夜飛颺
想君薄行更不思量誰爲傳書與表妾衷腸倚牖無言
垂血淚闍祝三光萬般無那處一爐香盡又更添香

又

怨綠窗獨坐修得爲君書征衣裁縫了遠寄邊虞想得
爲君貪苦戰不憚崎嶇中朝沙磧裏只憑三尺勇戰奸
愚 豈知紅臉淚滴如珠枉把金釵卜卦卦皆虛魂夢
天涯無暫歇枕上長噓待卿迴故日容顏憔悴彼此何

如

又

幸因今日得覩嬌娥眉如初月目引橫波素胸未消殘
雪透輕羅□□□□朱含碎玉雲髻婆娑東鄰有
女相料實難過羅衣掩袂行步逶迤逢人問語羞無力
態嬌多錦衣公子見垂鞭立馬腸斷知麼

又

兒家本是累代簪纓父兄皆是佐國良臣幼年生於閨
閣洞房深訓習禮儀足三從四德針指分明娉得良
人爲國遠長征爭名定難未有歸程徒勞公子肝腸斷
謾生心妾身如松柏守志強過曾女堅貞

天仙子

鶯語啼時三月半
煙蘸柳條金線亂
五陵原上有仙娥
攜歌扇香爛漫
留住九華雲一片
犀玉滿頭花滿面
負妾一雙偷
淚眼淚珠若得似珍珠
拈不散知何限
串向紅絲應百萬

又

鶯語鶯啼鶯覺夢
羞見鸞臺雙舞鳳
天仙別後信難通
無人問花滿洞
休把同心千徧弄
叵耐不知何處去
正是花開誰是主
滿樓明月夜三更
無人語淚如雨
便是思君腸斷處

竹枝子

羅幌塵生幘幘悄悄笙簧無緒理恨小郎遊蕩輕年不
施紅粉鏡臺前只是焚香禱祝天垂珠淚滴點點滴
成斑待伊來敬共伊言須改往來段卻顛

又

高捲珠簾垂玉牖公子王孫女顏容二八小娘滿頭珠
翠影爭光百步惟聞蘭麝香口含紅豆相思語幾度
遙相許修書傳與蕭郎儻若有意嫁潘郎休遣潘郎爭
斷腸

洞仙歌

華燭光輝深下幘幘恨征人久鎮邊夷酒醒後多風措
少年夫聳向綠窗下左偎右倚擬鋪鴛被把人尤泥

須索琵琶重理曲中彈到想夫憐處轉相愛幾多思意
卻在緒克鴛衾枕願長與今宵相似

又

悲雁隨陽解引秋光寒蛩響夜夜堪傷淚珠串滴旋流
枕上無計恨征人爭向金風漂蕩擣衣嘹亮嬾寄迴
文先往戰袍待穩絮重更熏香慙慙憑驛使追訪願四
塞來朝明帝令我客休施流浪

破陣子

蓮臉柳眉休韻青絲罷籠雲煖日和風花戴媚畫閣雕
梁鶯語新捲簾恨去人寂寞長垂珠淚焚香禱盡靈
神應是瀟湘紅粉繼不念當初羅帳恩拋兒虛度春

又

日煖風輕住景流鶯似問人正是越溪花捧豔獨隔千
山與萬津單于迷虜塵雪落停梅愁地香檀枉注歌
脣攔徑萋萋芳草綠紅臉可知珠淚頻魚箋豈易呈

又

風送征軒迢遞參差千里餘目斷妝樓相憶苦魚雁百
水鱗積疏和愁封去書春色可堪孤枕心焦夢斷初
早晚三邊無事了香被重眠比目魚雙眉應自舒

又

年少征夫堪恨從軍千里餘爲愛功名千里去攜劍彎
弓沙磧邊拋人如斷絃迢遞可知閨閣吞聲忍淚孤

眠春去春來庭樹老早晚王師歸卻還免教心怨天

浣沙溪

麗景紅顏越眾希素胸蓮臉柳眉低擬笑千花羞不坼
嬾芳菲 篇□□□□□□□□□□□□□□□□引五
陵思懇切要君知

又

髻縮湘雲淡淡妝早春花向臉邊芳玉腕慢從羅袖出
捧杯觴 纖手令行勻翠柳素咽歌發遶雕梁但是五
陵爭忍得不疏狂

柳青娘

青絲髻縮臉邊芳淡紅衫子掩素胸出門斜撚同心弄

意恫惶故使橫波認玉郎 叵耐不知何處去教人幾
度挂羅裳待得歸來須共語情轉傷斷卻妝樓伴小娘

又

碧羅冠子結初成肉紅衫子石榴裙故著煙脂輕輕染
淡施檀色注歌脣含情喚小鶯 只問玉郎何處去纔
言不覺到朱門扶入錦□□□□□慙慙因何辜負少
年人

傾杯樂

下缺

雲謠集雜曲子校記

雲謠原本雲作云董康校

鳳歸雲一砧杵擬董校擬塞雁原本下未空格枉勞原本

枉作往薄行疑校行

又二邊虞疑校虞不憚崎嶇原本憚作旦嶇中朝況校

終沙磧裏疑偶淚滴枉把長嘯原本裏作里滴作

董校

又三輕羅原本下未空知麼原本磨校

又四皆是原本董校曾女原本女校

天仙子二驚覺原是正是原本覺作教是

竹枝子一笙簧淚滴滴成原本簧作篁滴俱作的

滴上疑
有脫

又二

蕭郎

愚按郎疑娘誤

洞仙歌一

風措

重理

原本措作醋重作從並從

在緒克鴛

況校在緒

疑再絮克疑充或作對聲近兌而譌

今宵

原本今作金從董校

又二

串滴

擣衣嘹亮

原本滴作的擣作禱

破陣子一

蓮臉

原作蓮作

戴媚

愚按戴疑帶誤

又二

住景

況校住疑佳

正是

虜塵

枉注

原本是作時虜作慮枉作往並

校從董

又三

百水鱗積

愚按水封去書積並誤

去書

原本封作比目

比目

原本目作翼從

校董

又四

千里餘

愚按餘失

免教

原本教作交從董校

浣沙溪

原本浣作
渙從董校

芳菲

篇

原本非作非
未空格並從
況校

柳青娘

素胸

況校素
疑酥

故使

教人

原本故作固
作交並從董
校

又二故著

原本故作
固從董校

雲謠集雜曲子敦煌石室舊藏唐人寫卷子本今歸

英京博物館毘陵董授經游倫敦手錄見貽原題三

十首存十八首傾杯樂以下佚目亦無存集中脫句

譌文觸目而是授經閒有誕正未盡祛疑旋從吳伯

宛索得石印本用疏舉若干條質之況蕙風細意鉤

譚復多剗獲爰稽同異臚識如右其爲詞樸拙可喜

洵倚聲中椎輪大輅且爲中土千餘年來未睹之祕

籍亟付槧人以冠吾書以餉同嗜倘傾杯樂諸佚詞

得旦暮遇之俾斯集復成完帙益幸矣中元甲子始
春朱孝臧跋

尊前集目錄

明皇

好時光

昭宗

巫山一段雲

莊宗

一葉落

陽臺夢

歌頭

憶仙姿

李王

一斛珠

子夜

更漏子

浣溪沙

虞美人

李白

連理枝

清平樂五

菩薩蠻三

清平調三

韋應物

調笑二

三臺二

王建

宮中三臺二

江南三臺四

宮中調笑四

杜牧

八六子

劉禹錫

楊柳枝十

竹枝十

紇那曲二

憶江南

浪淘沙九

瀟湘神二

拋球樂二

楊柳枝二

白居易

楊柳枝十

竹枝四

浪淘沙六

憶江南三

宴桃源三

盧貞

楊柳枝

張志和

漁父

五

司空圖

酒泉子

韓偓

浣溪沙

二

薛能

楊柳枝

十八

成文幹

楊柳枝

十

馮延巳

擣練子

謁金門

玉樓春

溫飛卿

菩薩蠻

皇甫松

怨回紇

竹枝

拋毬樂

韋莊

怨王孫

定西蕃

清平樂

張泌

江城子

毛文錫

巫山一段雲

歐陽炯

南歌子

巫山一段雲

西江月

女冠子

更漏子

木蘭花

菩薩蠻

漁父

春光好

赤棗子

玉樓春

定風波

清平樂

菩薩蠻

和凝

江城子五

喜遷鶯

麥秀兩歧

孫光憲

浣溪沙十

定風波

南歌子二

應天長

生查子四

遐方怨

更漏子四

魏承班

生查子

滿宮花

菩薩蠻

謁金門三

閩選

謁金門

定風波

尹鶚

江城子

河滿子

女冠子

菩薩蠻

撥棹子

金浮圖

秋夜月

清平樂

李珣

中興樂

漁父

南鄉子

定風波

西溪子

李王

望江南

更漏子

蝶戀花

清平樂

採桑子

喜遷鶯

浣溪沙

馮延巳

羅敷豔歌

更漏子

臨江仙

虞美人

李王

子夜啼

庾傳素

木蘭花

劉侍讀

生查子

歐陽彬

生查子

許岷

木蘭花

林楚翹

菩薩蠻

薛昭蘊

謁金門

徐昌圖

木蘭花

河傳

臨江仙

新昌圖

水關

圖

尊前集

明皇一首

好時光

寶髻偏宜宮樣蓮臉嫩體紅香眉黛不須張敞畫天教
入鬢長莫倚傾國貌嫁取箇有情郎彼此當年少莫
負好時光

昭宗二首

巫山一段雲

上幸蜀宮人留題寶雞驛壁

縹緲雲閒質盈盈波上身袖羅斜舉動埃塵明豔不勝
春翠鬢晚妝煙重寂寂陽臺一夢冰眸蓮臉見長新
巫峽更何人

又

蝶舞梨園雪鶯啼柳帶煙小池殘日豔陽天苧蘿山又
山青鳥不來愁絕忍看鴛鴦雙結春風一等少年心
閒情恨不禁

莊宗四首

一葉落

一葉落寒朱箔此時景物正蕭索畫樓月影寒西風吹
羅幕吹羅幕往事思量著

陽臺夢

薄羅衫子金泥縫困纖腰怯銖衣重笑迎移步小蘭叢
彈金翹玉鳳嬌多情脈脈羞把同心撚弄楚天雲雨

卻相和又入陽臺夢

歌頭 大石調

賞芳春暖風飄箔鶯啼綠樹輕煙籠晚閣杏桃紅開繁
萼靈和殿禁柳千行斜金絲絡夏雲多奇峰如削紈扇
動微涼輕綃薄梅雨霽火雲爍臨水檻永日逃煩暑泛
觥酌 露華濃冷高梧彫萬葉一霎晚風蟬聲新雨歇
惜惜此光陰如流水東籬菊殘時歎蕭索繁陰積歲時
暮景難留不覺朱顏失卻好容光旦旦須呼賓友西園
長宵宴雲謠歌皓齒且行樂

憶仙姿

曾宴桃源深洞一曲清歌舞鳳長記欲別時和淚出門

相送如夢如夢殘月落花煙重

李王五首

一斛珠 商調

曉妝初過沈檀輕注些兒箇向人微露丁香顆一曲清
歌暫引櫻桃破羅袖裏殘殷色可杯深旋被香醪浣
繡牀斜凭嬌無那爛嚼紅茸笑向檀郎唾

子夜

人生愁恨何能免消魂獨我情何限故國夢重歸覺來
雙淚垂高樓誰與上長記秋晴望往事已成空還如
一夢中

更漏子 大石調

金雀釵紅粉面花裏暫時相見知我意感君憐此情須
問天香作穗蠟成淚還是兩人心意山枕膩錦衾寒
夜來更漏殘

浣溪沙

手捲眞珠上玉鉤依前春恨鎖眉頭風裏落花誰是主
思悠悠青鳥不傳雲外信丁香空結雨中愁回首綠
波三楚暮接天流

虞美人

中呂調

春花秋葉何時了往事知多少小樓昨夜又東風故國
不堪回首月明中雕闌玉砌依然在只是朱顏改不
知都有幾多愁恰是一江春水向東流

李白十二首

連理枝

黃鍾宮

雪蓋宮樓閉羅幕昏金翠鬪壓闌干香心淡薄梅梢輕
倚噴寶猊香燼麝煙濃馥紅綃翠被淺畫雲垂帔點
滴昭陽淚咫尺宸居君恩斷絕似遠千里望水晶簾外
竹枝寒守羊車未至

清平樂

禁庭春晝鶯羽披新繡百草巧求花下鬪祇賭珠璣滿
斗日晚卻理殘妝御前閒舞霓裳誰道腰肢窈窕折
旋笑得君王

又

禁闌清夜月探金窗罅玉帳鴛鴦噴蘭麝時落銀燈香
地女伴莫話孤眠六宮羅綺三千一笑皆生百媚宸
衷教在誰邊

又

煙深水闊音信無由達惟有碧天雲外月偏照懸懸離
別盡日感事傷懷愁眉似鎖難開夜夜長留半被待
君魂夢歸來

又

鸞衾鳳褥夜夜常孤宿更被銀臺紅蠟燭學妾淚珠相
續花貌些子時光拋人遠泛瀟湘敲枕悔聽寒漏聲
聲滴斷愁腸

又

畫堂晨起來報雪花墜高捲簾櫳看佳瑞皓色遠迷庭
砌盛氣光引爐煙素草寒生玉佩應是天仙狂醉亂
把白雲揉碎

菩薩蠻

中呂宮

游人盡道江南好游人只合江南老未老莫還鄉還鄉
空斷腸繡屏金屈曲醉入花叢宿春水碧於天畫船
聽雨眠

又

平林漠漠煙如織寒山一帶傷心碧暝色入高樓有人
樓上愁玉堦空佇立宿鳥歸飛急何處是回程長亭

接短亭

又

舉頭忽見衡陽雁
千聲萬字情何限
叵耐薄情夫一行
書也無
泣歸香閣恨和淚
淹紅粉待雁卻同時也無
書寄伊

清平調

雲想衣裳花想容
春風拂檻露華濃
若非羣玉山頭見
會向瑤臺月下逢

又

一枝紅豔露凝香
雲雨巫山枉斷腸
借問漢宮誰得似
可憐飛燕倚新妝

又

名花傾國兩相歡
常得君王帶笑看
解得春風無限恨
沈香亭北倚闌干

韋應物四首

調笑

胡馬胡馬遠放燕
支山下跑沙跑雪獨嘶
東望西望路
迷迷路迷路邊草無窮日暮

又

河漢河漢曉挂秋城漫漫
愁人起望相思江南塞北別
離離別離別河漢雖同路絕

三臺

一年一年老去來日後日花開未報長安平定萬國豈
得銜杯

又

冰泮寒塘水淥雨餘百草皆生朝來門巷無事晚下高
齋有情

王建十首

宮中三臺

魚藻池邊射鴨芙蓉苑裏看花日色赭袍相似不著紅
鸞扇遮

又

池北池南草綠殿前殿後花紅天子千秋萬歲未央明

月清風

江南三臺

揚州池邊少婦長干市裏商人三年不得消息各自拜
鬼求神

又

青草臺邊草色飛猿嶺上猿聲萬里三湘客到有風有
雨人行

又

樹頭花落花開道上人去人來朝愁暮愁卽老百年幾
度三臺

又

鬪身強健且爲頭白齒落難追準擬百年千歲能得幾
許多時

宮中調笑

團扇團扇美人病來遮面玉顏憔悴三年誰復商量管
絃絃管絃管春草昭陽路斷

又

胡蝶胡蝶飛上金枝玉葉君前對舞春風百葉桃花樹
紅紅樹紅樹燕語鶯啼日暮

又

羅袖羅袖暗舞春風已舊遙看歌舞玉樓好日新妝坐
愁愁坐愁坐一世虛生虛過

又

楊柳楊柳日暮白沙渡口船頭江水茫茫商人少婦斷腸腸斷腸斷鷓鴣夜飛失伴

杜牧一首

八六子

洞房深畫屏燈照山色凝翠沈沈聽夜雨冷滴芭蕉驚斷紅窗好夢龍煙細飄繡衾辭恩久歸長信鳳帳蕭疏椒殿閒肩輦路苔侵繡簾垂遲遲漏傳丹禁蕤華偷悴翠鬟羞整愁坐望處金輿漸遠何時綵仗重臨正消魂梧桐又移翠陰

劉禹錫三十八首

楊柳枝

塞北梅花羌笛吹
淮南桂樹小山詞
請君莫奏前朝曲
聽唱新翻楊柳枝

又

南陌東城春草時
相逢何處不依依
桃紅李白皆誇好
須得垂楊相發揮

又

鳳闕輕遮翡翠幃
龍墀遙望麴塵絲
御溝春水相輝映
狂殺長安年少兒

又

金谷園中鶯亂飛
銅駝陌上好風吹
城東桃李須臾盡

爭似垂楊無限時

又

花萼樓前初種時
美人樓上鬪腰肢
如今拋擲長街裏
露葉如啼欲恨誰

又

煬帝行宮汴水濱
數株殘柳不勝春
晚來風起花如雪
飛入宮牆不見人

又

御陌青門拂地垂
千條金縷萬條絲
如今縮作同心結
將贈行人知不知

又

城外春風吹酒旗
行人揮袂日西時
長安陌上無窮樹
唯有垂楊管別離

又

輕盈嫋娜占年華
舞榭妝樓處處遮
春盡絮飛留不得
隨風好去落人家

又

揚子江頭煙景迷
隋家宮樹拂金堤
嵯峨猶有當時色
半蘸波中水鳥棲

竹枝

白帝城頭春草生
白鹽山下蜀江清
南人上來歌一曲
北人莫上動鄉情

又

山桃紅花滿上頭蜀江春水拍山流花紅易衰似郎意
水流無限似儂愁

又

江上春來新雨晴灤西春水縠紋生橋東橋西好楊柳
人來人去唱歌行

又

日出三竿春霧消江頭蜀客駐蘭橈憑寄狂夫書一紙
住在成都萬里橋

又

兩岸山花似雪開家家春酒滿銀杯昭君坊中多女伴

永安宮外踏青來

又

瞿塘嘈嘈十二灘此中道路古來難
長恨人心不如水等閒平地起波瀾

又

巫峽蒼蒼煙雨時清猿啼在最高枝
箇裏愁人腸自斷由來不是此聲悲

又

城西門前豔瀨堆年年波浪不能摧
懊惱人心不如石少時東去復西來

又

楊柳青青江水平聞郎江上唱歌聲東邊日出西邊雨
道是無晴還有晴

又

楚水巴山江雨多巴人能唱本鄉歌今朝北客思歸去
回入紇那披綠蘿

紇那曲

楊柳鬱青青竹枝無限情同郎一回顧聽唱紇那聲

又

踏曲興無窮調同辭不同願郎千萬壽長作主人翁

憶江南

春去也多謝洛城人弱柳從風疑舉袂叢蘭裊露似沾

巾獨坐亦含嚔

浪淘沙

九曲黃河萬里沙浪淘風簸自天涯如今直上銀河去
同到牽牛織女家

又

洛水橋邊春日斜碧流輕淺見瓊沙無端陌上狂風急
驚起鴛鴦出浪花

又

汴水東流虎眼紋清淮曉色鴨頭春君看渡口淘沙處
渡卻人閒多少人

又

鸚鵡洲頭浪颭沙青樓春望日將斜銜泥燕子爭歸舍
獨自狂夫不憶家

又

濯錦江邊兩岸花春風吹浪正淘沙女郎翦下鴛鴦錦
將向中流定晚霞

又

日照澄洲江霧開淘金女伴滿江隈美人首飾侯王印
盡是沙中浪底來

又

八月濤聲吼地來頭高數丈觸山回須臾卻入海門去
捲起沙堆似雪堆

又

莫道讒言如浪深莫言遷客似沙沈
千淘萬漉雖辛苦吹盡寒沙始到金

又

流水淘沙不暫停前波未滅後波生
令人忽憶瀟湘渚回唱迎神三兩聲

瀟湘神

湘水流湘水流九疑雲物至今秋
若問二妃何處所零陵芳草露中愁

又

斑竹枝斑竹枝淚痕點點寄相思
楚客欲聽瑤瑟怨瀟

湘深夜月明時

拋毬樂

五色繡團圓登君玳瑁筵最宜紅燭下偏稱落花前上
客如先起應須贈一船

又

春早見花枝朝朝恨發遲及看花落後卻憶未開時幸
有拋毬樂一杯君莫違

楊柳枝

迎得春光先到來輕黃淺綠映樓臺只緣嫋娜多情思
便被春風長挫摧

又

巫峽巫山楊柳多朝雲暮雨遠相和因想陽臺無限事
爲君回唱竹枝歌

白居易二十六首

楊柳枝

六幺水調家家唱白雪梅花處處吹古歌舊曲君休聽
聽取新翻楊柳枝

又

陶令門前四五樹亞夫營裏百千條何似東都正二月
黃金枝映洛陽橋

又

依依嫋嫋復青青句引春風無限情白雪花繁空撲地

綠絲條弱不勝鶯

又

紅板江橋青酒旗
館娃宮暖日斜時
可憐雨歇東風定
萬樹千條各自垂

又

蘇州楊柳任君誇
更有錢塘勝館娃
若解多情尋小小
綠楊深處是蘇家

又

蘇家小女舊知名
楊柳風前別有情
剝條盤作銀環樣
捲葉吹爲玉笛聲

又

葉含濃露如啼眼枝嫋輕風似舞腰小樹不禁攀折苦
乞君留取兩三條

又

人言柳葉似愁眉更有愁腸似柳絲柳絲挽斷腸牽斷
彼此應無續得時

又

一樹春風萬萬枝嫩於金色軟於絲永豐南角荒園裏
盡日無人屬阿誰

又

一樹衰殘委泥土雙林榮曜植天庭定知此後天文裏
柳宿光中添兩星

竹枝

瞿塘峽口水煙低白帝城頭月向西唱得竹枝聲咽處
寒猿閒鳥一時啼

又

竹枝苦怨怨何人夜靜山空歇又聞蠻兒巴女齊聲唱
怨殺江南病使君

又

巴東船舫上巴西波面風生雨腳齊水蓼冷花紅簌簌
江籬濕葉碧淒淒

又

江畔誰家唱竹枝前聲斷咽後聲遲怪來調苦緣詞苦

多是通州司馬詩

浪淘沙

一泊沙來一泊去一重浪滅一重生相攪相淘無歇日
會教山海一時平

又

白浪茫茫與海連平沙浩浩四無邊暮去朝來淘不住
遂令東海變桑田

又

青草湖中萬里程黃梅雨裏一人行愁見灘頭夜泊處
風翻暗浪打船聲

又

借問江潮與海水何似君情與妾心相恨不如潮有信
相思始覺海非深

又

海底飛塵終有日山頭化石豈無時誰道小郎拋小婦
船頭一去沒回期

又

隨波逐浪到天涯遷客西還有幾家卻到帝都重富貴
請君莫忘浪淘沙

憶江南

江南好風景舊曾諳日出江花紅勝火春來江水綠如
藍能不憶江南

又

江南憶最憶是杭州山寺月中尋桂子郡亭枕上看潮頭何日更重游

又

江南憶其次憶吳宮吳酒一杯春竹葉吳娃雙舞醉芙蓉早晚復相逢

宴桃源

前度小花靜院不比尋常時見見了又還休愁卻等閒分散腸斷腸斷記取釵橫鬢亂

又

落月西窗驚起好箇恩恩些子鬢髮輕鬆凝了一雙

秋水告你告你休向人閒整理

又

頻日雅歡幽會打得來來越殺說著暫分飛蹙損一雙
眉黛無奈無奈兩箇心兒總待

盧貞一首

楊柳枝

一樹依依在永豐兩枝飛去杳無蹤玉皇曾採人閒曲
應逐歌聲入九重

張志和五首

漁父

西塞山邊白鷺飛桃花流水鱖魚肥青箬笠綠蓑衣斜

風細雨不須歸

又

釣臺漁父褐爲裘
兩兩三三舴艋舟
能縱棹慣乘流
長江白浪不曾憂

又

雲溪灣裏釣魚翁
舴艋爲家西復東
江上雪浦邊風笑
著荷衣不歎窮

又

松江鱗舍主人歡
菰飯蓴羹亦共餐
楓葉落荻花乾
醉宿漁舟不覺寒

又

青草湖中月正圓
巴陵漁父棹歌連
釣車子
檝頭船樂
在風波不用仙

司空圖一首

酒泉子

買得杏花十載歸來方始坼
假山西畔藥闌東
滿枝紅
旋開旋落旋成空
白髮多情人便惜
黃昏把酒祝東風
且從容

韓偓二首

浣溪沙

攏鬢新收玉步搖
背燈初解繡裙腰
枕寒衾冷異香焦
深院下關春寂寂
落花和雨夜迢迢
恨情殘醉卻無

聊

又

宿醉離愁慢髻鬟六銖衣薄惹輕寒慵紅悶翠掩青鸞
羅襪況兼金菡萏雪肌仍是玉琅玕骨香腰細更沈檀

薛能十八首

楊柳枝

華清高樹出深宮南陌柔條帶晚風誰見輕陰是良夜
瀑泉聲伴月明中

又

洛橋晴景覆江船羌笛秋聲濕塞煙閒想習池公宴罷

水蒲風絮夕陽天

又

嫩綠輕懸似綴旒
路人遙見隔宮樓
誰能更近丹墀種
解播皇風入九州

又

暖風晴日斷浮埃
廢路新條發釣臺
處處輕陰可惆悵
後人攀折古人栽

又

潭上江邊嫋嫋垂
日高風靜絮相隨
青樓一樹無人見
正是女郎眠覺時

又

汴水高懸百萬條風清兩岸一時搖隋家力盡虛栽得
無限春風屬聖朝

又

和花煙樹九重城夾路春陰十萬營唯向邊頭不堪望
一株顛顛少人行

又

窗外齊垂曉日初樓邊輕好暖風徐游人莫道栽無益
桃李清陰卻不如

又

眾木猶寒獨早青御溝橋畔曲江亭陶家舊日應如此
一院春條綠透廳

又

帳優纓垂細復繁
心想在石家園
風條月影皆堪重
何事侯門愛樹萱

又

數首新詞帶恨成
柳絲牽我我傷情
柔娥幸有腰肢穩
試踏吹聲作唱聲

又

高出軍營遠映橋
賊兵曾斫火曾燒
風流性在終難改
依舊春來萬萬條

又

縣依陶令想嫌迂
營伴將軍卻太粗
此日與君除萬恨

數簫風調更應無

又

朝陽晴照綠楊煙一別通波十七年應有舊枝無覓處
萬條風裏卓旌旃

又

晴垂芳態吐芽新雨擺輕條濕面春別有出牆高數尺
不知搖動是何人

又

暖梳簪朶事登樓困挂垂楊立地愁牽斷綠絲攀不及
半空懸著玉搔頭

又

西園高樹後庭根處處尋芳有斷痕終憶舊時桃葉合
一株斜映竹籬門

又

劉白蘇臺總近時當時章句是誰推纖腰舞盡春楊柳
未有儂家一首詩

成文幹十首

楊柳枝

欲趁寒梅趁得麼雪中偷眼望陽和陽和若不先留意
這箇柔條爭柰何

又

輕籠小徑近誰家玉馬追風翠影斜愛把長條惱公子

惹他頭上海棠花

又

鵝黃翦出小花鈿綴上芳枝色轉鮮飲散無人收拾得
月明堦下伴秋干

又

東君愛惜與先春草澤無人處也新委屬露華并細雨
莫教遲日苦風塵

又

句踐初迎西子年琉璃爲帚埽溪煙至今不改當時色
留與王孫繫酒船

又

綠楊移傍小亭栽，便擁濃煙撥不開。
誰把金刀爲刪掠，放教明月入窗來。

又

遠接山河高接雲，雨餘洗出半天春。
牡丹不用相輕薄，自有清陰覆得人。

又

掩映鶯花媚有餘，風流才調比應無。
朝朝奉御龍池上，不羨青松拜大夫。

又

王孫宴罷曲江池，折得春光伴醉歸。
怪得美人爭鬪乞，要他穠翠染羅衣。

又

殘照林梢嫋數枝能招醉客上金堤馬嬌如練纓如火
瑟瑟陰中步步嘶

馮延巳三首

壽練子

深院靜小庭空斷續寒砧斷續風早是夜長人不寢數
聲和月到簾櫳

謁金門

風又起吹皺一池春水閒引鴛鴦花徑裏手按紅杏蕊
鬪鴨闌干獨倚碧玉瓏璫斜墜終日望君君不至舉

頭聞鵲喜

玉樓春

雪雲乍變春雲簇
漸覺年華堪縱目
北枝梅蕊犯寒開
南浦波紋如酒綠
芳菲次第長相續
自是情多無處足
尊前百計得春歸
莫爲傷春眉黛蹙

溫飛卿五首

菩薩蠻

玉纖彈處眞珠落
流多暗濕鉛華薄
春露浥朝華
秋波浸晚霞
風流心上物
本爲風流出
看取薄情人
羅衣無此痕

又

南園滿地堆輕絮
愁聞一霎清明雨
雨後卻斜陽
杏花

零落香 無言彈睡臉枕上屏山掩時節欲黃昏無慘
獨倚門

又

夜來皓月纔當午重門悄悄無人語深處麝煙長臥時
留薄妝 當年還自惜往事那堪憶花露月明殘錦衾
知曉寒

又

雨晴夜合玲瓏月萬枝香嫩紅絲拂閒夢憶金堂滿庭
萱草長 繡簾垂景歛眉黛遠山綠春水渡溪橋凭闌
魂欲消

又

竹風輕動庭除冷珠簾月上玲瓏影山枕隱穠妝綠檀
金鳳皇兩蛾愁黛淺故國吳宮遠春恨正關情畫樓
殘點聲

皇甫松十首

怨回紇

白首南朝女愁聽異域歌收兵頡利國飲馬胡盧河
毳布腥膻久穹廬歲月多雕窠城上宿吹笛淚滂沱

又

祖席駐征棹開帆候信潮隔筵桃葉泣吹管杏花飄
船去鷗飛閣人歸塵上橋別離惆悵淚江路濕紅蕉

竹枝

檳榔花發

竹枝鷓鴣啼兒雄飛煙瘴枝此亦飛兒

又

木棉花盡

竹枝荔枝垂兒千花萬花枝待郎歸兒

又

芙蓉並蒂

竹枝一心連兒花侵隔子枝眼應穿兒

又

筵中蠟燭

竹枝淚珠紅兒合歡桃核枝兩人同兒

又

斜江風起

竹枝動橫波兒劈開蓮子枝苦心多兒

又

山頭桃花

竹枝谷底杏兒兩花窈窕枝遙相映兒

拋球樂

紅撥一聲飄輕裘墜越綃墜越綃帶翻金孔雀香滿繡
蜂腰少少拋分數花枝正索饒

又

金蹙花毬小眞珠繡帶垂繡帶垂幾回衝鳳蠟千度入
香懷上客終須醉觥盃且亂排

韋莊五首

怨王孫

錦里蠶市滿街珠翠千萬紅妝玉蟬金雀寶髻花簇鳴
璫繡衣長日斜歸去人難見青樓遠隊隊行雲散不
知今夜何處深鎖蘭房隔仙鄉

定西蕃

挑盡金燈紅燼人灼灼漏遲遲未眠時斜倚銀屏無語
閒愁上翠眉悶殺梧桐殘雨滴相思

又

芳草叢生結縷花豔豔雨濛濛曉庭中塞遠久無音問
愁消鏡裏紅紫燕黃鸝猶生恨何窮

清平樂

瑣窗春暮滿地梨花雨君不歸來情又去紅淚散沾金
縷夢魂飛斷煙波傷心不柰春何空把金針獨坐鴛
鴦愁繡雙窠

又

綠楊春雨金線飄千縷花折香枝黃鸝語玉勒雕鞍何處
碧窗望斷燕鴻翠簾睡眼溟濛寶瑟誰家彈罷含
悲斜倚屏風

張泌一首

江城子

窄羅衫子薄羅裙小腰身晚妝新每到花時長是不宜
春早是自家無氣力更被伊惡憐人

毛文錫一首

巫山一段雲

貌掩巫山色才過濯錦波阿誰提筆上銀河月裏寫嫦
娥薄薄施鉛粉盈盈挂綺羅菖蒲花役魂夢多年代

屬元和

歐陽炯三十一首

南歌子

錦帳銀燈影
紗窗玉漏聲
迢迢永夜夢
難成愁對小庭
秋色月空明

漁父

擺脫塵機上
釣船免教榮辱有
流年無繫絆
沒愁煎須
信船中有散仙

又

風浩寒溪照膽明
小君山上玉蟾生
荷露墜翠煙輕撥
刺游魚幾箇驚

巫山一段雲

絳闕登真子，飄飄御彩鸞。碧虛風雨佩光寒，斂袂下雲
端。月帳朝霞薄，星冠玉藥攢。遠游蓬島降人間，特地
拜龍顏。

又

春去秋來也，愁心似醉醺。去時邀約早回輪，及去又何
曾。歌扇花光斲，衣珠滴淚新。恨身翻不作車塵，萬里
得隨君。

春光好

天初暖，日初長。好春光。萬彙此時皆得意，競芬芳。筍
迸苔錢嫩，綠花偎雪塢。濃香誰把金絲裁，翦卻挂斜陽。

又

花滴露柳搖煙豔陽天雨霽山櫻紅欲爛谷鶯遷
飲處交飛玉斝游時倒把金鞭風颭九衢榆葉動簇青錢

又

胸鋪雪臉分蓮理繁絃纖指飛翻金鳳語轉嬋娟
嘈噴如敲玉佩清冷似滴香泉曲罷問郎名箇甚想夫憐

又

磧香散渚冰融暖空濛飛絮悠揚徧虛空惹輕風
柳眼煙來點綠花心日與妝紅黃雀錦鸞相對舞近簾櫳

又

雞樹綠鳳池清滿神京玉兔宮前金榜出列仙名
疊

雪羅袍接武團花駿馬嬌行開宴錦江游爛漫柳煙輕

又

芳叢肅綠筵張兩心狂空遣橫波傳意緒對笙簧雖

似安仁擲果未聞韓壽分香流水桃花情不已待劉郎

又

垂繡幔掩雲屏思盈盈雙枕珊瑚無限情翠釵橫幾

見纖纖動處時聞款款嬌聲卻出錦屏妝面了理秦箏

又

金轡響玉鞭長映垂楊堤上採花筵上醉滿衣香無

處不攜絃管直應占斷春光年少王孫何處好競尋芳

又

蘋葉嫩杏花明畫船輕雙浴鴛鴦出綠汀棹歌聲春
水無風無浪春來半雨半晴紅粉相隨南浦晚莫辭行
西江月
月映長江秋水分明冷浸星河淺沙汀上白雲多雪散
幾叢蘆葦扁舟倒影寒潭裏煙光遠罩輕波笛聲何
處響漁歌兩岸蘋香暗起

又

水上鴛鴦比翼巧將繡作羅衣鏡中重畫遠山眉春睡
起來無力鈿雀穩簪雲髻綠含羞時想佳期臉邊紅
豔對花枝猶占鳳樓春色

赤棗子

夜悄悄燭熒熒金爐香盡酒初醒春睡起來回雪面含羞不語倚雲屏

又

蓮臉薄柳眉長等閒無事莫思量每一見時明月夜損人情思斷人腸

女冠子

薄妝桃臉滿面縱橫花靨豔情多綬帶盤金縷輕裙透碧羅含羞眉乍斂微語笑相和不會頻偷眼意如何

又

秋宵秋月一朵荷花初發照前池搖曳熏香夜嬋娟對鏡時藥中千點淚心裏萬條絲恰似輕盈女好風姿

玉樓春

日照玉樓花似錦樓上醉和春色寢綠楊風送小鶯聲
殘夢不成離玉枕 堪愛晚來韶景甚寶柱秦箏方再
品青蛾紅臉笑來迎又向海棠花下飲

又

春早玉樓煙雨夜簾外櫻桃花半謝錦屏香冷繡衾寒
怱悵憶君無計捨 侵曉鵲聲來砌下鸞鏡殘妝紅粉
罷黛眉雙點不能描留待玉郎歸日畫

更漏子

玉闌干金鰲井月照碧梧桐影獨自箇立多時露華濃
濕衣 一向凝情望待得不成模樣雖叵耐又尋思怎

生瞋得伊

又

三十六宮秋夜永露華點滴高梧丁丁玉漏咽銅壺明
月上金鋪紅線毯博山爐香風暗觸流蘇羊車一去
長青蕪鏡塵鸞影孤

定風波

暖日閒窗映碧紗小池春水浸晴霞數樹海棠紅欲盡
爭忍玉閨深掩過年華獨凭繡牀方寸亂腸斷淚珠
穿破臉邊花鄰舍女郎相借問音信教人羞道未還家

木蘭花

兒家夫婿心容易身又不來書不寄閒庭獨立鳥關關

爭忍拋奴深院裏 悶向綠紗窗下睡睡又不成愁已
至今年卻憶去年春同在木蘭花下醉

清平樂

春來堦砌春雨如絲細春地滿飄紅杏蒂春燕舞隨風
勢 春幡細縷春繒春闈一點春燈自是春心撩亂非
干春夢無憑

菩薩蠻

曉來中酒和春睡四肢無力雲鬢墜斜臥臉波春玉郎
休惱人 日高猶未起爲戀鴛鴦被鸚鵡語金籠道兒
還是慵

又

紅爐暖閣佳人睡隔簾飛雪添寒氣小院奏笙歌香風
簇綺羅酒傾金盞滿蘭燭重開宴公子醉如泥天街
聞馬嘶

又

翠眉雙臉新妝薄幽閨斜捲青羅幕寒食百花時紅繁
香滿枝雙雙梁燕語蝶舞相隨去腸斷正思君閒眠
冷繡茵

又

畫屏繡閣三秋雨香脣膩臉偎人語語罷欲天明嬌多
夢不成曉街鐘鼓絕瞋道如今別特地氣長吁倚屏
彈淚珠

和凝七首

江城子

初夜含嬌入洞房
理殘妝柳眉長
翡翠屏中親爇玉爐
香整頓金鈿呼小玉
排紅燭待潘郎

又

竹裏風生月上門
理秦箏對雲屏
輕撥朱絃恐亂馬嘶
聲含恨含嬌獨自語
今夜月太遲生

又

斗轉星移玉漏頻
已三更對棲鶯
歷歷花閒似有馬蹄
聲含笑整衣開繡戶
斜斂手下堦迎

又

迎得郎來入繡闈語相思連理枝鬢亂釵垂梳墮印山
眉姪姘含情嬌不語纖玉手撫郎衣

又

帳裏鴛鴦交頸情恨雞聲天已明愁見街前還是說歸
程臨上馬時期後會待梅綻月初生

喜遷鶯

曉月墜宿煙披銀燭錦屏敲建章欲曉玉繩低宮漏出
花遲春態淺來雙燕紅日漸長一線嚴妝鐘罷轉黃
鸝飛上萬年枝

麥秀兩歧

涼簟鋪斑竹鴛枕並紅玉臉蓮紅眉柳綠胸雪宜新浴

淡黃衫子裁春縠異香芬馥 羞道教回燭未慣雙雙
宿樹連枝魚比目掌上腰如束嬌嬈不柰人拳跼黛眉
微蹙

孫光憲二十三首

浣溪沙

風撼芳菲滿院香四簾慵捲日初長鬢雲垂枕響微鏗
春夢未成愁寂寂佳期難會信茫茫萬般心千點淚
泣蘭堂

又

碧玉衣裳白玉人翠眉紅臉小腰身瑞雲飛雨逐行雲
除卻弄珠兼解佩便隨西子與東鄰是誰容易比真

眞

又

何事相逢不展眉
苦將情分惡猜疑
眼前行止想應知
半恨半瞋回面處
和嬌和淚泥
人時萬般饒得爲憐

伊

又

落絮飛花滿帝城
看看春盡又傷情
歲華頻度想堪驚
風月豈唯今日恨
煙霄終待此身榮
未甘虛老負平

生

又

靜想離愁暗淚零
欲棲雲雨計難成
少年多是薄情人

生 萬種保持圖永遠一般模樣負神明到頭何處問平

又

試問於誰分最多便隨人意轉橫波縷金衣上小雙鵝
醉後愛稱嬌姐姐夜來留得好哥哥不知情事久長
麼

又

葉墜空堦折早秋細煙輕霧鎖妝樓寸心雙淚慘嬌羞
風月但牽魂夢苦歲華偏感別離愁恨和相憶兩難

酬

又

月淡風和畫閣深露桃煙柳影相侵斂眉凝緒夜沈沈
長有夢魂迷別浦豈無春病入愁心少年何處戀虛
襟

又

自入春來月夜稀今宵蟾彩倍疑暉強開襟抱出簾帷
鬢指暗思花下約凭闌羞覩淚痕衣薄情狂蕩幾時
歸

又

十五年來錦岸游未曾何處不風流好花長與萬金酬
滿眼利名渾信運一生狂蕩恐難休且陪煙月醉紅
樓

定風波

簾拂疏香斷碧絲
淚衫還滴繡黃鸝
上國獻書人不在
凝黛晚庭又是落花時
春日自長心自促
翻覆年來年去負前期
應是秦雲兼楚雨
留駐向花誇說月中枝

南歌子

豔冶青樓女
風流字楚眞
驪珠美玉未爲珍
窈窕一枝芳柳入腰身
舞袖頻回雪歌聲幾動塵
慢凝秋水顧情人
祇緣傾國著處覺生春

又

映月論心處
偎花見面時
倚郎和袖撫香肌
遙指畫堂深院許相期
解佩君非晚
虛襟我未遲
願如連理合

歡枝不似五陵狂蕩薄情兒

應天長

翠凝仙豔非凡有窈窕年華方十九鬢如雲腰似柳妙
對綺筵歌醪酒醉瑤臺攜玉手共宴此宵相偶魂斷
晚窗分首淚沾金縷袖

生查子

春病與春愁何事年年有半爲枕前人半爲花閒酒
醉金尊攜玉手共作鴛鴦偶倒載臥雲屏雪面腰如柳

又

爲惜美人嬌長有如花笑半醉倚紅妝轉語傳青鳥
眷方深憐恰好唯恐相逢少似這一般情肯信春光老

又

清曉牡丹芳紅豔凝金蕊乍占錦江春永認笙歌地
感人心爲物瑞爛漫煙光裏戴上玉釵時迴與凡花異

又

密雨阻佳期盡日顛然坐簾外正淋漓不覺愁如鎖
夢難裁心欲破淚逐檐聲墮想得玉人情也合思量我

遐方怨

紅綬帶錦香囊爲表花前意殷勤贈玉郎此時更役心
腸轉添秋夜夢魂狂思豔質想嬌妝願早傳金箋同
歡臥醉鄉任人情妒惡猜防到頭須使似鴛鴦

更漏子

燭熒煌香旖旎閒放一堆鴛被慵就寢獨無繆相思魂
欲消 不會得這心力判了依前還憶空自怨柰伊何
別來情更多

又

掌中珠心上氣愛惜豈將容易花下月枕前人此生誰
更親 交頸語合歡身便同比目金鱗連繡枕臥紅茵
霜天暖似春

又

對秋深離恨苦數夜滿庭風雨凝想坐斂愁眉孤心似
有違 紅窗靜畫簾垂魂消地角天涯和淚聽斷腸窺
漏移燈暗時

又

求君心風韻別渾似一團煙月歌皓齒舞紅籌花時醉
上樓能婉媚解嬌羞王孫忍不攀留唯我恨未綢繆
相思魂夢愁

魏承班六首

生查子

離別又經年獨對芳菲景嫁得薄情夫長抱相思病
花紅柳綠閒晴空蝶弄雙雙影羞看繡羅衣爲有金鸞
竝

滿宮花

寒夜長更漏永愁見透簾月影王孫何處不歸來應在

倡樓酩酊 金鴨無香羅帳冷羞更雙鸞交頸夢中幾
度見兒夫不忍罵伊薄倖

菩薩蠻

玉容光照菱花影沈沈臉上秋波冷白雪一聲新雕梁
起暗塵 寶釵搖翡翠香惹芙蓉醉攜手入鴛衾誰人
知此心

謁金門

煙水闊人值清明時節雨細花零鸚語切愁腸千萬結
雁去音徽斷絕有恨欲憑誰說無事傷心猶不徹春
時容易別

又

春欲半堆砌落花千片早是潘郎長不見忍聽雙語燕
飛絮晴空颺遠風送誰家絃管愁倚畫屏凡事懶淚
沾金縷線

又

長思憶思憶佳人輕擲霜月透簾澄夜色小屏山凝碧
恨恨君何太極記得嬌嬈無力獨坐思量愁似織斷
腸煙水隔

閩選二首

謁金門

美人浴碧沼蓮開芬馥雙髻縮雲顏似玉素蛾輝淡綠
雅態芳姿閒淑雪映鈿裝金斛水濺青絲珠斷續酥

融香透肉

定風波

江水沈沈帆影過游魚到晚透寒波渡口雙雙飛白鳥
煙裏蘆花深處隱漁歌扁舟短棹歸蘭浦人去蕭蕭
竹徑透青莎深夜無風新雨歇涼月露迎珠顆入圓荷

尹鶉十一首

江城子

裙拖碧步飄香纖腰束素長鬢雲光拂面瓏璫膩玉碎
凝妝寶柱秦箏彈向晚絃促雁更思量

河滿子

雲雨常陪勝會笙歌慣逐閒游錦里風光應占玉鞭金

勒驂騶戴月潛穿深曲和香醉脫輕裘 方喜正同鴛
帳又言將往皇州每憶良宵公子伴夢魂長挂紅樓欲
表傷離情味丁香結在心頭

女冠子

雙成伴侶去去不知何處有佳期霞帔金絲薄花冠玉
葉危 懶乘丹鳳子學跨小龍兒叵耐天風緊挫腰肢
菩薩蠻

嗚嗚曉角調如語畫樓三會喧雷鼓枕上夢方殘月光
鋪水寒 蛾眉應斂翠咫尺同千里宿酒未全消滿懷
離恨饒

又

錦茵閒襯丁香枕銀釭燼落猶慵寢
顛坐徧紅爐誰知情緒孤少年狂蕩慣
花曲長牽絆去便不歸來空教駿馬回

撥棹子

風切切深秋月十朶芙蓉繁豔歇
小檻細腰無力空贏得目斷魂飛何處說
寸心恰似丁香結看看瘦盡胸
前雪偏挂恨少年拋擲羞覩見繡被堆紅閒不徹

又

丹臉膩雙靨媚冠子縷金裝翡翠
將一朶瓊花堪比窠窠繡鸞鳳衣裳
香窰地銀臺蠟燭滴紅淚淥酒勸人
教半醉簾幕外月華如水特地向寶帳
顛狂不肯睡

金浮圖

繁華地王孫富貴玳瑁筵開下朝無事壓紅茵鳳舞黃
金翅玉立纖腰一片揭天歌吹滿目綺羅珠翠和風淡
蕩偷散沈檀氣 堪判醉韶光正媚坼盡牡丹豔迷人
意金張許史應難比貪戀歡娛不覺金烏墜還惜會難
別易金船更勸勒住花驄轡

秋夜月

三秋佳節罩晴空凝碎露茱萸子結菊蕊和煙輕撚酒
浮金屑微雲雨調絲竹此時難輟歡極一片豔歌聲揭
黃昏慵別炷沈煙熏繡被翠帷同歇醉並鴛鴦雙枕
暖偎春雪語丁寧情委曲論心正切深夜窗透數條斜

月

清平樂

低紅斂翠盡日思閒事
鬢滑鳳皇釵欲墜
雨打梨花滿地
繡衣獨倚闌干
玉容似怯春寒
應待少年公子
鴛幃深處同歡

又

芳年妙伎淡拂鉛華翠
輕笑自然生百媚
爭那尊前人意
酒傾琥珀杯時
更堪能唱新詞
贈得王孫狂處
斷腸一搦腰肢

李珣十八首

中興樂

後庭寂寂日初長
翩翩蝶舞紅芳繡簾垂地金鴨無香
誰知春思如狂憶蕭郎等閒一去程遙信斷五嶺三湘
休開鸞鏡學宮妝可能更理笙簧倚屏凝睇淚落成
行手尋裙帶鴛鴦暗思量忍孤前約教人花貌虛老風
光

漁父

水接衡門十里餘
信船歸去臥看書
輕爵祿慕玄虛
莫道漁人只爲魚

又

避世垂綸不記年
官高爭得似君閒
傾白酒對青山
笑指柴門待月還

又

棹警鷗飛水濺袍影隨潭面柳垂絲終日醉絕塵勞曾
見錢塘八月濤

南鄉子

攜籠去采菱歸碧波風起雨霏霏趁岸小船齊棹急羅
衣濕出向桄榔樹下立

又

雲髻重葛衣輕見人微笑亦多情拾翠採珠能幾許來
還去爭及村居織機女

又

登畫舸泛清波採蓮時唱採蓮歌攔棹聲齊羅袖斂池

光飈驚起沙鷗八九點

又

雙髻墜小眉彎笑隨女伴下春山玉纖遙指花深處爭
回顧孔雀雙雙迎日舞

又

紅荳蔻紫玫瑰謝娘家傍越王臺一曲鄉歌齊撫掌堪
游賞酒酌螺杯流水上

又

山果熟水花香家家風景有池塘木蘭舟上珠簾捲歌
聲遠椰子酒傾鸚鵡琰

又

新月上遠煙開慣隨潮水採珠來棹穿花過歸溪口沽
春酒小艇纜牽垂岸柳

定風波

志在煙霞慕隱淪功成歸看五湖春一葉舟中吟復醉
雲水此時方認自由身花鳥爲鄰鷗作侶深處經年
不見市朝人已得希夷微妙旨潛喜荷衣蕙帶絕纖塵

又

十載逍遙物外居白雲流水似相於乘興有時攜短棹
江島誰知求道不求魚到處等閒邀鶴伴春岸野花
香氣撲琴書更飲一杯紅霞酒回首半鉤新月貼清虛

又

又見新巢燕子歸
阮郎何事絕音徽
簾外西風黃葉落
池閣隱莎蛩叫雨霏霏
愁坐算程千萬里
等閒經歲兩心違
聽鵲憑龜無定處
不知淚痕流在畫羅衣

又

雁過秋空夜未央
隔窗煙月鎖蓮塘
往事豈堪容易想
惆悵故人迢遞在瀟湘
縱有回文重疊意
誰寄解鬟臨鏡泣
殘妝沈水香
消金鴨冷
愁永候蟲聲接杵聲長

又

簾外煙和月滿庭
此時閒坐若爲情
小閣擁爐殘酒醒
愁聽寒風葉落一聲聲
唯恨玉人芳信阻
雲雨屏帷寂寞夢難成
斗轉更闌心杳杳
將曉銀釭斜照綺琴橫

西溪子

馬上見時如夢認得臉波相送柳堤長無限意夕陽裏
醉把金鞭欲墜歸去想嬌嬈暗魂消

又

金縷翠鈿浮動妝罷倚窗圓夢日高時春已老人未到
滿地落花慵掃離思正難緘燕喃喃

李王八首

望江南

多少恨昨夜夢魂中還似舊時游上苑車如流水馬如
龍花月正春風

又

多少淚斷臉復橫
頤心事莫將和淚說
鳳笙休向淚時吹
腸斷更無疑

更漏子

大石調

柳絲長
春雨細
花外漏聲迢遞
驚塞雁起
寒烏畫屏金鷓鴣
香霧薄
透重幕
惆悵謝家池閣
紅燭背繡帷垂
夢長君不知

蝶戀花

遙夜亭皋閒信步
乍過清明早覺傷春暮
數點雨聲風約住
朦朧淡月雲來去
桃杏依依風暗度
誰在秋千笑裏低低語
一片芳心千萬緒
人閒沒箇安排處

清平樂

別來春半觸目愁腸斷砌下落梅如雪亂拂了一身還
滿雁來音信無憑路遙歸夢難成離恨恰如春草更
行更遠還生

探桑子

羽調

亭前春逐紅英盡舞態徘徊細雨霏霏不放雙眉時暫
開綠窗冷靜芳音斷香印成灰可柰情懷欲睡朦朧
入夢來

喜遷鶯

曉月墜宿煙微無語枕頻敲夢回芳草思依依天遠雁
聲稀啼鶯散餘花亂寂寞畫堂深院片紅休掃儘從
伊留待舞人歸

浣溪沙

菡萏香消翠葉殘
西風愁起綠波閒
還與韶光共憔悴
不堪看
細雨夢回雞塞遠
小樓吹徹玉笙寒
多少淚
珠何限恨倚闌干

馮延巳七首

羅敷豔歌

小庭雨過春將盡
片片花飛獨折殘
枝不語凭闌只自
知
玉堂香暖珠簾捲
雙燕歸來舊約難
期肯信韶華
得幾時

又

馬嘶人語春風岸
芳草縣縣楊柳橋
邊落日高樓酒旆

懸 舊愁新恨知多少目斷遙天獨立花前更聽笙歌
滿畫船

更漏子

商調

夜初長人近別夢覺一窗殘月鸚鵡臥蟋蟀鳴西風寒
未成紅蠟燭彈棋局牀上畫屏山綠寒繡幌倚瑤琴
前歡淚滴襟

又

玉爐煙紅燭淚偏對畫堂秋思眉翠薄鬢雲殘夜長衾
枕寒梧桐樹三更雨不道離情正苦一葉葉一聲聲
空堦滴到明

臨江仙

冷紅飄起桃花片，青春意緒闌珊。高樓簾幕捲輕寒。酒
餘人散，獨自倚闌干。夕陽千里連芳草，風光愁殺王
孫。徘徊飛盡碧天雲。鳳城何處，明月照黃昏。

虞美人

畫簾新霽，情蕭索，深夜垂珠箔。洞房人睡，月嬋娟，梧桐
雙影上珠軒。立堦前。高樓何處，連宵宴塞管聲幽。怨
一聲已斷，別離心，舊歡拋棄，杳難尋。恨沈沈。

又

碧波朱戶垂簾幕，簾下鶯鶯語。薄羅衣舊泣青春。野
花芳草，逐年新事，難論。鳳笙何處，高樓月，幽怨憑誰說。
亭亭殘照上梧桐，一時彈淚與東風，恨重重。

李王一首

子夜啼

花明月暗籠輕霧，今宵好向郎邊去。剗襪步香苔，手提金縷鞋。畫堂南畔見，一向偎人顫。好爲出來難，教君恣意憐。

庾傳素一首

木蘭花

木蘭紅豔多情態，不似凡花人不愛。移來孔雀檻邊栽，折向鳳皇釵上戴。是何芍藥爭風彩，自共牡丹長作對。若教爲女嫁東風，除卻黃鸝難匹配。

劉侍讀一首

生查子

雙調

深秋更漏長，滴盡銀臺燭。獨步出幽閨，月晃波澄綠。
菱荷風乍觸，一對鴛鴦宿。虛棹玉釵驚，驚起還相續。
歐陽彬左丞一首

生查子

竟日畫堂歡，入夜重開宴。翦燭蠟煙香，促席花光顫。
待得月華來，滿院如鋪練。門外簇驂騮，直待更深散。

許岷二首

木蘭花

大石調

小庭日晚花零落，倚戶無聊妝臉薄。寶箏金鴨任生塵，
繡畫工夫全放卻。有時覩著同心結，萬恨千愁無處

說當初不合儘饒伊贏得如今長恨別

又

江南日暖芭蕉展美人折得親裁翦書成小柬寄情人
臨行更把輕輕撚其中撚破相思字卻恐郎疑蹤不
似若還猜妾倩人書誤了平生多少事

林楚翹一首

菩薩蠻

中呂宮

畫堂春晝垂珠箔臥來揉惹金釵落簾滑枕頭移鬢蟬
狂欲飛笑拖嬌眼慢羅袖籠花面重道好郎君人前
莫惱人

薛昭蘊一首

謁金門

春滿院疊損羅衣金線睡覺水晶簾未捲簾前雙語燕
斜捲金鋪一扇滿地落花千片早是相思腸欲斷忍
教頻夢見

徐昌圖三首

木蘭花

雙調

沈檀煙起盤紅霧一箭霜風吹繡戶漢宮花面學梅妝
謝女雪詩裁柳絮長垂夾幕孤鸞舞旋炙銀笙雙鳳
語紅窗酒病嚼寒冰冰損相思無夢處

臨江仙

飲散離亭西去浮生長恨飄蓬回頭煙柳漸重重淡雲

孤雁遠寒日暮天紅
今夜畫船何處潮平淮月朦朧
酒醒人靜柰愁濃殘燈孤枕夢輕浪五更風

河傳

秋光滿目風清露白蓮紅水綠何處夢回弄珠拾翠盈
盈倚蘭橈眉黛蹙探蓮調穩吳侶聲相續倚棹吳江
曲鷺起暮天幾雙交頸鴛鴦入蘆花深處宿

尊前集校記

李王

浣溪沙

眉頭

毛晉刻本
作重樓

李白

連理枝

淺畫

似遠

毛本遠
作遙

韋應物

三臺

冰泮

門巷

毛本作
衡門

王建

宮中三臺

魚藻

紅鸞

原本鸞作
燕从毛本

江南三臺

樹頭

朝愁暮愁

原本朝愁暮三
字缺据毛本補

劉禹錫

楊柳枝

鳳關

龍墀

原本墀作塵从毛本

又御

拂地

原本作不見从毛本

竹枝

江上

江上

毛本江作溪

楊柳枝

得迎

挫摧

毛本作請按

白居易

竹枝

瞿塘

閒鳥

毛本閒作聞

又竹枝

齊聲

毛本作聲聲

又巴東

簌簌

毛本作簇簇

又江畔

誰家

毛本家作人

浪淘沙

隨波漁父調名止

原本此首至張志和脫据毛本補

張志和

漁父

青草

不用仙

毛本作不覺寒

薛能

楊柳枝

朝陽

無覓處

毛本作無處覓

又

西園

斷痕

毛本作斷作折

温飛卿

菩薩蠻

玉纖

原本此首注云一作袁國傳

皇甫松

拋毬樂

紅撥

墜越綃

毛本無重文三字下首同

韋莊

怨王孫

原本三字缺据毛本補

定西蕃

毛本蕃作番

又芳

結縷毛本作縷

猶生案生字疑在誤

歐陽炯

春光好芳叢

芳叢肅毛本肅作縷

西江月映月

寒潭裏毛本無裏字

又上

雲髻綠毛本無綠字

清平樂

細縷案縷疑當作鏤

和凝

喜遷鶯

春態淺原本三字脫据毛本補

孫光憲

浣溪沙淡月

愁心毛本愁作離

南歌子豔治

字楚真毛本字作似 祇緣原本作占斷下七字竝缺据毛本改補

更漏子

中掌

暖似

毛本作暖似

尹鶚

清平樂

紅低

低紅

毛本作低紅作俚

李珣

漁父

棹警

垂絛

毛本絛作縹

南鄉子

紅荳

家傍

毛本傍作接

定風波

又見

新巢

毛本新作辭

千萬里

毛本下有頻跋二字

李王

更漏子

柳絲

原本絲作絮从毛本

蝶戀花

笑裏

毛本笑作影

清平樂

砌下

毛本下作伴

探桑子

原本三字缺
据毛本補

馮延巳

羅敷豔歌

小庭

香暖

毛本作春

歸來

毛本作來歸

更漏子

王

正苦

毛本正作最

尊前集一卷錢塘丁氏善本書室藏梅禹金鈔本尊

前集屢見宋人紀載惟直齋書錄解題歌詞一類所

採至詳獨未之及明嘉禾顧梧芳刻於萬厯壬午序

稱聯其所製爲上下二卷名曰尊前集又稱素愛花

閒集而余所編第有類焉毛子晉重刻之則謂尊前

集本不傳梧芳采錄多篇釐爲二卷仍其舊名一若

輯自顧氏之手者四庫提要嘗辨之明季刻書往往

故爲眩亂顧氏此序且不能自圓其說矣朱竹垞見
吳匏庵手鈔本取勘顧本章次悉同因定爲宋初人
編輯是本爲禹金珍奔押以印記丁氏藏書志謂禹
金去萬厯時不遠如果爲顧輯必不鄭重如此按歐
陽公近體樂府羅泌校語已引尊前集蝶戀花玉樓
春二條金匱集菩薩蠻注云五首已見尊前集竝與
今本合惟羅校長相思深畫眉一首云尊前集作唐
無名氏詞爲今本所無吳伯宛謂流傳稍有遺易其
非顧氏重輯則稿無可疑且卷中注舉一作云云亦
爲尙有他本之證今依梅本寫定其脫誤處以毛本
斟補未暇旁徵也甲寅冬十有一月歸安朱孝臧跋

樂府補題目錄

天香

八

水龍吟

十

摸魚子

五

齊天樂

十

桂枝香

四

樂府補題

天香

宛委山房擬賦龍涎香

玉筍

王沂孫

聖與

孤嶠蟠煙層濤蛻月驪宮夜探

一作探

鉛水汛逝

一作遠

槎

風夢深薇露化作斷魂心字紅蕢候火還乍識冰環玉

指一縷縈簾翠影依稀海山雲氣

幾回磔嶠半醉翦

春燈夜寒花碎更好故溪飛雪小窗深閉荀令如今頓

老總忘卻尊前舊風味謾惜餘薰空篝素被

蘋洲

周

密

公謹

碧腦浮冰紅薇染露驪宮玉唾誰擣麝月雙心鳳雲百

和寶玦佩環爭巧濃薰淺炷疑醉度干花春曉金餅著
衣餘潤銀葉透簾微裊素被瓊篝夜悄酒初醒翠屏
深杳一作一縷舊情空趁斷煙飛繞羅袖餘馨漸少悵
朱閣淒涼夢難到誰念韓郎清愁漸老

天柱 王易簡 理得

煙嶠收痕雲沙擁沫孤槎萬里春聚蠟杵冰塵水研花
片帶得海山風露纖痕透曉銀鏤小初浮一縷重翦紗
窗暗燭深垂繡簾微雨餘馨惱人最苦染羅衣少年
情緒謾省佩珠曾解蕙羞蘭妒好是芳釵翠嫵恨素被
濃薰夢無據待翦秋雲殷勤寄與

友竹 馮應瑞 祥父

枯石流痕殘沙擁沫驪宮夜蟄驚起海市收時鮫人分
處誤入眾芳叢裏春霖未就都化作淒涼雲氣惟有清
寒一點消磨小窗殘醉 當年翠箒素被拂餘薰倦懷
如水謾惜舞紅猶在爲誰重試幾片金昏字古向故篋
聊將伴憔悴□□□□□□□□□□□□□□□□□□□□□□

瑤翠 唐藝孫 英發

螺甲磨星犀株杵月蕤英嫩壓拖水海蜃樓高仙娥鈿
小縹緲結成心字麝煤候暖載一朵輕雲不起銀葉初
生薄暈金猊旋翻纖指 芳杯惱人漸醉碾微馨鳳團
閒試滿架舞紅都換懶收珠佩幾片菱花鏡裏更摘索
雙鬟伴秋睡早是新涼重薰翠被

紫雲 呂同老 和甫

冰片鎔肌水沈換骨蜿蜒夢斷瑤一作羸島翦碎腥雲杵
勻枯沫妙手製成翻巧金篝候火無似有微薰初好簾
影垂風不動屏深護春宜小 殘梅舞紅褪了佩珠寒
滿懷清峭幾度酒餘重省舊愁多少荀令風流未減怎
奈向飄零賦情老待寄相思仙山路杳

篔房 李彭老 商隱

擣麝成塵薰薇注露風酣百和花氣品重雲形一作頭葉
翻蕉樣共說內家新製波浮海沫誰喚覺鮫人春睡清
潤俱饒片腦芬馥一作排半是沈水 相逢酒邊雨外火
初溫翠爐煙細不似寶珠金縷領巾紅墜荀令如今憔悴

悴消未盡當時愛香意燼暖燈寒秋聲素被

五松 李居仁 師呂

瀛嶠浮煙滄波挂月潛虬睡起清曉萬里槎程一番花
信付與露薇冰腦織雲漸暖凝翠席氤氳不了銀葉重
調火活珠簾日垂風悄 螺屏酒醒夢好繡羅幃依舊
痕少幾度試拈心字暗驚芳抱隱約仙舟一作路杳謾
佩影玲瓏護嬌小素手金篝春情未老

水龍吟

浮翠山房擬賦白蓮

蘋洲 周 密 公謹

素鸞飛下青冥舞衣半惹涼雲碎藍田種玉綠房迎曉

一箇秋意擎露盤深憶君清夜暗傾鉛水想鴛鴦正結

梨雲好夢西風冷還驚起應是飛瓊仙會倚涼颿碧

簪斜墜輕妝鬪目一作白明璫照影紅衣羞避霽月三更

粉雲千點靜香十里聽湘絃奏徹冰綃偷翦聚相思淚

天柱 王易簡 理得

翠裳微護冰肌夜深暗泣瑤臺露芳容淡泞風神蕭散

凌波晚步西子殘妝環兒初起未須勻注看明璫素襪

相逢憔悴當應被西一作薰風誤十里雲愁雪妒抱淒

涼盼嬌無語當時姊妹朱顏褪酒紅衣按舞別浦重尋

舊盟唯有一行鷗鷺伴玉顏月曉盈盈冷豔洗人閒暑

宛委 陳恕可 行之

素姬初宴瑤池佩環誤落雲深處分香華井洗妝湘渚
天姿淡泞碧葢吹涼玉冠迎曉盈盈笑語記當時乍識
江明夜靜一作淨只愁被嬋娟誤幾點沙邊飛鷺舊盟
寒遠迷煙雨相思未盡纖羅曳水清鉛泣露玉鏡臺空
銀瓶綆絕斷魂何許待今宵試探一作採中流一葉共凌
波去

菊山唐珣玉潛

淡妝人更嬋娟晚匳淨洗鉛華膩泠泠月色蕭蕭風度
嬌紅斂避太液池空霓裳舞倦不堪重記歎冰魂猶在
翠輿難駐玉簪爲誰輕墜別有凌空一葉泛清寒素
波千里珠房淚溼明璫恨遠舊遊夢裏羽扇生秋瓊樓

不夜尙遺仙意奈香雲易散綃衣半脫露涼如水

紫雲 呂同老 和甫

素肌不汗天真曉來玉立瑤池裏亭亭翠蓋盈盈素靨
時妝淨洗太液波翻霓裳舞罷斷魂流水甚依然舊日
濃香淡粉花不似人憔悴 欲喚凌波仙子泛扁舟浩
波千里只愁回首冰簾一作半掩明璫亂墜月影淒迷
露華零落小闌誰倚共芳盟猶有雙棲雪鷺夜寒驚起

月洲 趙汝鈞 真卿

露華洗盡凡妝玉妃來侍瑤池宴風裳水佩冰肌雪豔
清涼不汗解語情多凌波步穩酒容易一作散想溫泉
浴罷天然真態渾疑是宮妝淺 暗想一作淒愁別岸

粉痕消香腮凝汗雪空冰冷此情唯許鷺知鷗見羽扇
微搖翠帷低擁清涼庭院待夜深月上闌干更邀取姮
娥伴

玉筍 王沂孫 聖與

淡妝不掃蛾眉爲誰竚立羞明鏡真妃解語西施淨洗
娉婷顧影薄露初勻纖塵不染移根玉井想飄然一葉
颼颼短髮中流臥浮煙艇 可惜瑤臺路迴抱淒涼月
中誰一作難認相逢還是冰壺浴罷牙牀酒醒步襪空留
羽衣微褪粉殘香冷望海山依約時時夢想素波千頃

五松 李居仁 師呂

藥仙羣擁宸遊素肌似怯波心冷霜裳縞夜冰壺凝露

紅塵洗盡弄玉輕盈飛瓊綽約淡妝臨鏡更多情一片
碧雲不掩籠嬌面回清影菱唱數聲乍聽載名娃藕
絲縈艇雪鷗沙鷺夜來同夢曉風吹醒酒暈全消粉痕
微漬色明香瑩問此花盍貯瑤池應未許繁紅並

玉田 張炎 叔夏

仙人掌上芙蓉娟娟猶溼一作裏金盤露淡妝照水纖

裳立玉無言飄飄似自舞幾度消凝滿湖煙月一汀

鷗鷺記小舟清夜一作宵波明香遠渾不見花開處應

是浣沙人妒褪紅衣被誰輕誤閒情淡雅冶容清潤憑

嬌待語隔浦相逢偶然傾蓋似傳心素怕湘皋佩解綠

雲十里捲西風去別本後闕云應是浣紗人妒褪紅衣

意趣待折瓊芳楚江難涉謾搖心素
怕湘娥佩解綠雲十里捲西風去

玉筍 王沂孫 聖與

翠雲遙擁環妃夜深按徹霓裳舞鉛華淨洗娟娟出浴
盈盈解語太液荒寒海山依約斷魂何許甚人閒別有
冰肌雪豔嬌無那頻相顧 三十六陂煙雨甚淒涼向
誰一作有誰向堪訴如今謾說仙姿自潔芳心更苦羅襪
初停玉璫還解早淩波去試乘風一葉重來月底與脩
花譜

摸魚兒

紫雲山房擬賦蓴

天柱 王易簡 理得

怪鮫宮水晶簾捲冰痕初斷香縷澄波蕩槩人初到三
十六坡煙雨春又去伴點點荷錢隱約吳中路相思日
暮恨洛浦娉婷芳鈿翠翦匳影照淒楚功名夢消得
西風一度高人今在何許鱸香菰冷斜陽裏多少天涯
意緒誰記取但枯豉紅鹽溜玉凝秋筯尊前起舞算唯
有淵明黃花歲晚此興共千古

佚名

過湘皋碧龍驚起冰涎猶護髯影春洲未有菱歌伴獨
占暮煙千頃呼短艇試翦取纖條玉溜青絲瑩尊前細
認似水面新荷波心半掩點點翠鈿淨淒涼味酪乳
那堪比並吳鹽一筯秋冷當時不爲鱸魚去聊爾動一作

勤渠歸興還記省是幾度西風幾度吹愁醒鷗昏鷺暝
謾換得霜痕蕭蕭兩鬢羞與共秋鏡

菊山 唐 珣 玉潛

漸滄浪凍痕消盡瓊絲初漾明鏡鮫人夜翦龍髯滑織
就水晶簾冷鳧葉淨最好似嫩荷半捲浮晴影玉流翠
凝早枯豉融香紅鹽和雪醉齒嚼清瑩 功名夢曾被
秋風喚醒故人應動高興悠然世味渾如水千里舊懷
誰省空對景奈回首姑蘇臺畔愁波暝煙寒夜靜但只
有芳洲蘋花共一作與老何日泛歸艇

玉筍 王沂孫 聖與

玉簾寒翠絲微斷浮空清影零碎碧芽也抱春洲怨雙

捲小緘芳字還又似繫羅帶相思幾點青鈿綴吳中舊
事悵酪乳爭奇鱸魚謾好誰與共秋醉 江湖興昨夜
西風又起年年輕誤歸計如今不怕歸無準卻怕故人
千里何況是正落日垂虹怎賦登臨意滄浪夢裏縱一
舸重遊孤懷暗老餘恨渺煙水

篋房 李彭老 商隱

過垂虹四橋飛雨沙痕初漲春水腥波十里吳歛遠綠
蔓半縈船尾連復碎愛滑捲青綃香裊冰絲細山人雋
味笑杜老無情香羹碧淵空只賦芹美 歸期早誰似
季鷹高致鱸魚相伴菰米紅塵如海北園夢一葉又秋
風起湘湖外看采擷芳條際曉隨魚市舊遊謾記但望

裏江南秦鬟賀鏡渺渺隔煙翠

齊天樂

餘閒書院擬賦蟬

紫雲 呂同老 和甫

綠陰初蔽林塘路淒淒乍流清韻倦咽高槐驚嘶別柳
還憶當時曾聽西窗夢醒歎絃絕重調珥空難整綽約
冰綃夜深誰念露華冷 不知身世易老一聲聲斷續
頻報秋信墜葉山明疏枝月小惆悵齊姬薄倖餘音未
盡早枯翼飛仙暗嗟殘景見洗冰匳怕翻雙翠鬢

天柱 王易簡 理得

翠

一作碧

雲深鎖齊姬恨織柯暗翻冰羽錦瑟重調綃衣

乍著聊飲人閒風露相逢甚處記槐影初涼柳陰新雨
聽盡殘聲爲誰驚起又飛去商量秋信最早晚來吟
未徹卻一作都是淒楚斷韻還連餘悲似咽欲和愁邊佳
句幽期誰語怕寒葉凋零蛻痕塵土古木斜暉向人懷
抱苦

玉筍 王沂孫 聖與

綠陰干樹西窗曉厭厭晝眠驚起嫩翼風微流聲露悄
半翦冰箋誰寄淒涼倦耳謾重拂琴絲怕尋冠珥夢短
宮深向人猶與訴憔悴殘虹收盡過雨晚來頻斷續
都是秋意病葉難留纖柯易老空憶斜陽身世山明月
碎甚已絕餘音尙餘一作遺枯蛻鬢影參差斷魂青鏡裏

蘋洲 周 密 公 謹

槐陰忽送清冷

一作商

怨依稀乍聞還歇故苑愁長

一作深

危枝

一作絃

調苦前夢蛻痕枯葉傷情念別是幾度斜陽

幾回殘月轉眼西風一襟幽恨向誰說

輕鬟猶記動

影翠奩應怪我雙鬢如雪枝冷頻移葉疏猶抱空負好

秋時節淒淒切切漸迤邐黃昏砌蛩相接露洗餘悲暮

寒聲更咽

宛委 陳 恕 可 行之

碧柯搖曳聲何許陰陰晚涼庭院露溼身輕風生翅薄
昨夜綃衣初翦琴絲宛轉弄幾曲新聲幾番悽惋過雨
高槐爲渠一洗故宮怨 清虛襟度漫與向人低訴處

幽思無限敗葉枯形殘陽絕響消得西風腸斷塵情已
倦任翻鬢雲寒綴貂金淺蛻羽難留頓覺一作驚仙夢遠

菊山唐珏玉潛

蠟

一作蛻

痕初染仙莖露新聲又移涼影佩玉流空綺衣

翦霧幾度槐昏柳暝幽窗睡醒奈欲斷還連不堪重聽
怨結齊姬故宮煙樹翠陰冷當時舊情在否晚妝清
鏡裏猶記嬌鬢亂咽頻驚餘悲漸杳搖曳風枝未定秋
期話盡又抱葉淒淒暮寒山靜付與孤蛩苦吟清夜永

瑤翠唐藝孫英發

柳風微扇閒池閣深林翠陰人靜漸理琴絲誰調金奏
淒咽流空清韻虹明雨潤正乍集庭柯凭闌新聽午夢

驚回有人嬌困酒初醒
西軒晚涼又嫩向枝頭占得

銀露千頃蛻翦花輕羽翼一作翻紙薄老去易驚秋信殘

聲送暝恨秦樹斜陽暗催光景淡月疏桐半窗留鬢影

宛委 陳恕可 行之

蛻仙飛佩流空遠珊珊數聲林杪薄暑眠輕濃陰聽久
句引淒涼多少長吟未了想猶怯高寒又移深窈與整
綃衣滿身風露正清曉 微薰庭院晝永那回曾記得
如訴幽抱斷響難尋餘悲獨省葉底還驚秋早齊宮路
杳歎往事一作往魂消夜闌人悄謾省輕盈粉匳雙鬢好

山邨 仇 遠 仁近

夕陽門巷荒城曲清音早鳴秋樹薄翦綃衣涼生鬢影

獨飲天邊風露朝朝暮暮奈一度淒吟一番淒楚尙有
殘聲驀然飛過別枝去齊宮往事謾省行人猶與說
當時齊女雨歇空山月籠古樹一作柳髣髴舊曾聽處離
情正苦甚嬾拂冰絃倦拈琴譜滿地紅霜一作紅霜淺莎尋
蛻羽

玉筍 王沂孫 聖與

一襟遺恨宮魂斷年年翠陰庭宇一作樹乍咽涼柯還移

暗葉重把離愁低訴西園過雨漸金錯鳴刀玉笋調柱

鏡掩殘妝爲誰嬌鬢尙如許銅仙鉛淚似洗歎攜盤

去遠難貯零露病翼驚秋枯形閱世消得斜陽幾度餘

音更苦甚獨抱清高頓成淒楚謾想薰風柳絲千萬縷

桂枝香

天柱山房擬賦解

宛委 陳恕可 行之

西風故國記乍免內黃歸夢溪曲還是秦星夜映楚霜
秋足無腸枉抱東流恨任年年褪匡微綠草汀篝火蘆
洲緯箔早寒漁屋 敘舊別芳篳薦玉正香擘新橙清
泛佳菊依約行沙亂雪誤驚窗竹江湖歲晚相思遠對
寒一作青燈謾懷幽獨嫩湯浮眼枯形蛻殼斷魂重續

瑤翠 唐藝孫 英發

收帆渡口認遠岸夜篝松炬如晝還見沙痕雪漲一作際
水紋霜後秦宮夢到無腸斷望明河月斜一作殘疏柳瑣

窗相對茶邊猶記眼波頻溜
漸嫩菊初篸綠酒歎風
味尊前瀟灑如舊幾度金橙香霧玉盤纖手清愁小醉
淒涼裏拚今生容易消瘦草心春淺年年相憶看燈時
候

菊山 唐 珣 玉潛

松江舍北正水落晚汀霜老枯荻還見青匡似繡紺螿
如戟西風有恨無腸斷恨東流幾番潮汐夜燈爭聚微
光挂影誤投簾隙 更喜薦新篸玉液正半殼含黃一
醉秋色纖手香橙風味有人相憶江湖歲晚聽飛雪但
沙痕空記行迹至今茶鼎時時猶認眼波愁碧

紫雲 呂同老 和甫

松江岸側正亂葉墜紅殘浪收碧猶記燈寒暗聚斷疏
輕入休嫌郭索尊前笑且開顏共傾芳液翠橙絲霧玉
蔥浣雪嫩黃初擘自與一作那日新詩換得又幾度相
逢落潮秋色常是籬邊早菊慰渠岑寂如今謾有江山
興更誰憐草泥蹤迹但將身世浮沈醉鄉舊遊休憶

樂府補題一卷知不足齋叢書本四庫提要謂皆宋
遺民詞榮前讀周止庵宋詞選於唐玉潛賦白蓮曰
冰魂猶在翠輿難駐曰珠房淚溼明璫恨遠以爲當
爲元僧楊璉真伽發宋諸陵而作又賦蟬曰佩玉流
空綃衣翦霧曰晚妝清鏡裏猶記嬌鬢疑亦指其事
今讀此卷依類求之此意無不可通殆卽玉潛所謂
只有春風知此意年年杜宇哭冬青者也作者十四
人一佚其名四庫提要謂無姓名者二人非也宛委
爲陳行之別號而宛委山房賦龍涎香陳不與焉紫
雲爲呂和甫別號而紫雲山房賦萼呂不與焉天柱
爲王理得別號而天柱山房賦螭王不與焉浮翠山

房賦白蓮餘閒書院賦蟬浮翠餘閒卷中未見竊謂
浮翠卽唐英發之瑤翠而譌以本卷例之宋季遺民
中如有以餘閒爲別號者則所佚姓名不難推測而
知矣庚申六月歸安王樹榮剛齋跋